

**SEVENTH LEGISLATIVE ASSEMBLY OF MIZORAM
(ELEVENTH SESSION)**

LIST OF BUSINESS

FOR SECOND SITTING ON WEDNESDAY, THE 7th DECEMBER,
2016

(Time 10:30 A.M. to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

LAYING OF PAPERS

2. **Pu LALRINLIANA SAILO** to lay on the Table of the House a copy each of the following :

- i) Statement of Actions taken by the Government against the recommendations contained in the Fifth Report of Committee on Public Undertakings on the Report of C&AG of India for the year 2007-2008 relating to Zoram Industrial Development Corporation (ZIDCO) under Commerce and Industries Department.
- ii) Statement of Actions taken by the Government against the recommendations contained in the Sixth Report of Committee on Public Undertakings on the Report of C&AG of India for the year 2010-2011 relating to Zoram Industrial Development Corporation (ZIDCO) under Commerce and Industries Department.

PRESENTATION OF REPORT

3. **Pu LALRINLIANA SAILO** to present to the House the Seventh Report of Committee on Public Undertakings relating to Commerce and Industries Department.

LEGISLATIVE BUSINESS

Bill for introduction, consideration and passing

4. **Pu PC. LALTHANLIANA**, Minister to beg leave of the House to introduce “The Mizoram Drug (Controlled Substances) Bill, 2016”.

ALSO

to introduce the Bill

to move that the Bill be taken into consideration

AND

to move that the Bill be passed.

NGURTHANZUALA
Secretary

....

DEPUTY SPEAKER : Chungnungbera hmuha hleih neih te leh mi chanai chhuhsak te hi Lalpa huat zawng tak a ni e.

Tah Hla 3:35-36

Zawhna leh chhanna hun kan hmang ang a. Starred Question no.21-na zawt turin Pu Lalruatkima i lo sawm ang.

Pu LALRUATKIMA : Pu Deputy Speaker, ka lawm e. Ka Starred Question no.21-na GAD Minister zahawm tak chhan atan :

- (a) Sorkar hna Group 'A' 'B' and 'C' post lak thar turah Computer thiamna en tel a ni tawh dawn em ?
- (b) A nih dawn chuan engtik atanga hman tan tur nge ?
- (c) Computer thiam tih hian eng chin tur nge tih ka zawt e.

DEPUTY SPEAKER : Chhang turin Chief Minister zahawm tak Pu Lal Thanhawla i lo sawm ang.

Pu LAL THANHAWLA, CHIEF MINISTER : Pu Deputy Speaker, member zahawm tak Pu Lalruatkima zawhna chhanna chu –

- (a) Driver Grade III leh Conductor Grade III post tel lovin Group 'A' 'B' leh 'C' post dang zawng zawng atana recruitment-ah chuan en tel a ni tawh dawn.
- (b) 1st April, 2017 atangin.
- (c) Service Rules/Recruitment Rules-in thiamna a pawm bik chin bithliah sa a awm a nih loh chuan NIELIT atanga Course on Computer Concepts (CCC) emaw, Mizoram State Council of Technical Education-in zirna in a pawmpui atanga Diploma in Computer Application, Certificate in Computer Application emaw, sorkar in Computer Course dang tul a tih anga a notify leh te a huam ang tih a ni.

DEPUTY SPEAKER : Zawhbelhna a awm em? Pu Lalruatkima.

Pu LALRUATKIMA : Pu Deputy Speaker, ka lawm e. Kan Minister zahawm tak khan a rawn chhang a. Helaiha hian kan Service Rules amendment-ah khan NIELIT leh Mizoram State Council of Technical Education-in a recognized institution te atangin tiin a rawn sawi a. MSCTE hian NIELIT tel lo hian institution 29 chauh a recognized si a. Phai ramah pawh institution tha tak tak computer course zir theihna kha a awm baw si a. Khang mite khan sorkar hna an dil thei dawn lo nge, kan ram chhungah pawh recognized ni lem lo zirna in changtlung tak tak kha a awm baw si a. Khalai kha kan rules-ah hian a awm lo niin a lang a. Chuvang chuan mi tam takin sorkar hna kan dil thei dawn ta lo tih na em ni ang? Institution MSCTE in a recognized leh NIELIT lo ah khan tih kan zawt tel a.

Tin, hei bakah hian hemi Mizoram State Council of Technical Education hian consolidated rules a neihah hian amendment te pawh a rawn siam a. Kan Minister zahawm tak kha House Leader a ni baw k a, chu chu 2016-ah rules-ah chuan Diploma

Course rules kan nei a, khami kha repeal angin 2012-a kan Certificate Course Rules kha repeal ang khan a rawn sawi a. Amaherawhchu, han enchian khan a repeal-na Gazette No. kha kan han en a, 376-ah chuan Obituary tih a lo ni leh bawk si a. Chuvangin khalai kha min enthat sak thei lom ni, sorkar in a hria em tih kha kan zawt tel nghal a ni.

DEPUTY SPEAKER : Zawhbelhna dang a awm em ? Awm lo maw. Le, chhang turin Chief Minister zahawm tak sawm ang.

Pu LAL THANHAWLA, CHIEF MINISTER : Pu Deputy Speaker, member zahawm tak te hi kei aia hre zawk vek an ni a. An hriat hi hre lo der ang deuh ten an zawt thin a, mipui tana fiahna tur te pawh a ni ang a, a lawmawm a. A dil kha thiang lo a awm thei lo a, an dil thei vek a. Tin, mawl taka ngaihtuah pawhin all India ah recognized institute tam tak a awm a. Chung atanga pass chhuak hetiang equivalent te hi chu pawm loh thu a awm lo hrim hrim a, sorkar mawl ber tan pawh, kha kha han chian hmasak phawt a tulin ka hria a.

Tin, kan Gazette ni 6.10.2016-ah khan a chiang thawkhatin ka hria a, a copy in lo nei mai thei a. Tin, Mizoram Group 'A' 'B' leh 'C' post Service Recruitment Amendment Rules, 2016 in computer literacy atana qualification a lo tarlan tawh te NIELIT hnuai Course on Computer Concepts emaw, Mizoram State Council of Technical Education approved Institution atanga Diploma in Computer Application emaw, certificate in computer Application emaw te bakah hian amendment rules in sorkara thuneihna a pek angin Mizoram sorkar chuan a hnuai Computer Course hrang hrang zinga khawi emaw ber hi sorkar hna thawk thar tur ten an neih tur leh Group 'D' atanga Group 'C' post atana kaisanna atan an neih turin a pawm thar a. Hemi chungchang notification hi DP&AR in hun reilote chhungin Gazette-ah a chhuah thuai dawn a ni. Chung Computer Course te chu - Course on Computer Concepts or Expert Computer Course under NIELIT or O Level, B Level, C Level Courses under NIELIT or Diploma in Computer Science, Computer Application, Information Technology, Electronics from Polytechnic Institution or Institutions recognized under Government of Mizoram or Government of India or Bachelor Degree in Computer Science, Computer Application, Information Technology, Electronics from recognized University or Institutions recognized under Government of Mizoram or Government of India. Post Graduate Diploma or master Degree in Computer Science, Computer Application, Information Technology, Electronics from recognized University or Institutions recognized under Government of Mizoram or Government of India.

He ruahmanna hian Group 'A' 'B' 'C' post a sorkar hnathawk lak thar tur computer qualification sang zawk for eg. Degree, Post Graduate, Diploma etc. lo nei ten NIELIT hnuai CCC emaw MSCTE hnuai CCA emaw, BCA emaw an pass leh kher ngai lovin hna dil thei turin an qualify nghal dawn tihna a ni. Chuvangin, khalam panga qualification nei chin, helaia pawm ang chi kha chu an theih vek dawn tihna a ni ang Pu Deputy Speaker.

DEPUTY SPEAKER : A huam zau khawp alawm chu. Le, Starred Question no.22-na zawt turin Pu Lalthanliana i lo sawm ang.

Pu LALTHANLIANA : Pu Deputy Speaker, ka lawm e.

Health & Family Welfare Department Minister zahawm tak chhan atana ka zawhna Starred Question no. 22-na chu hei hi a ni -

- (a) Tun dinhmunah Aizawl Civil Hospital-ah Nurse engzatnge awm ?
- (b) Nurse pakhatin damlo engzatnge enkawl tur a nih?
- (c) Tun kum January thla leh October thla inkar chhung hian (average) chawhrualin ni khatah Hospital-ah damlo engzatnge admit an nih ? Ka lawm e.

DEPUTY SPEAKER : Chhang turin a changtu Minister zahawm tak Pu Lal Thanzara i lo sawm ang.

Pu LAL THANZARA, MINISTER : Pu Deputy Speaker, Starred Question no. 22 na , Aizawl North II bialtu zahawm tak Pu Lalthanliana zawhna chhanna chu -

- (a) Civil Hospital Aizawl ah Nurse 176 (za sawmsarih paruk) an awm.
- (b) Indian Nursing Council norms in a sawi angin Nurse pakhat in damlo 9 zel a enkawl ang a, ICU ah a danglam bik a, Nurse pakhatin damlo 3 a enkawl tur a ni.
- (c) January leh October thla chhung khan Civil Hospital Aizawl-a indoor patient admit zat 12,713 (singkhat sanghnih za sarih leh sawm pathum) , daily average 51 (sawmnga leh pakhat) tih a ni e.

DEPUTY SPEAKER : Zawhbelhna a awm em ? Awle, Pu Lalthanliana.

Pu LALTHANLIANA : Pu Deputy Speaker, ka zawhbelhna chu Kulikawn Hospital-ah hian nikhatah damlo engzatnge a average-in in entir? Doctor leh Nurse engzatnge he Hospital-ah hian awm tih kha a chhan theih leh min han chhang sela.

DEPUTY SPEAKER : Zawhbelhna Pu Lalruatkima.

Pu LALRUATKIMA : Pu Deputy Speaker, ka zawhbelhna chu - Tunhnaia MPSC in Nurse an lak a recommend te kha engvanga cancel leh nge a nih? Engtianga ruahmanna siam nge a nih a, engtikahnge thar thawh leh tum a nih tih kha ka'n zawt e.

DEPUTY SPEAKER : Er. Lalrinawma.

Er. LALRINAWMA : Pu Deputy Speaker, ka lawm e. Civil Hospital khi Nurse an indaih lo em em mai a, an khawngaihthlak lutuk a, an day off pawh khi an la hlei thei lova. Tahchuan Nurse 176 zingah hian Nurse engzatnge site ah chhuak? Bed-side Nurse engzatnge tih ka zawt e.

DEPUTY SPEAKER : Ngawi rawh u, 3 chin kan ti a, a dangah a lo chhuah leh i zawh belh leh mai dawn nia. Pathum chin kha kan kalphung a nih kha.

Le, a inkarkik deuh a, a chhan theih theih chhang turin Minister i lo sawm ang.

Pu LAL THANZARA, MINISTER : Pu Deputy Speaker, zawhna neitu Pu Thanliana zawh belhna kha chu tunah ka chhang thei mai lova, Civil Hospital atan chauh khan kan lo inring a, a tul a nih chuan nakinah ziak pawhin kan la pe leh thei tho va.

Tin, tun tuma MPSC in Nurse an lak chungchang kha DP&AR in minrawn dan angin hma lak a ni a, tahchuan kan han enchian khan Procedure ah lapse a awm a ni tih hriat a nih avang khan MPSC decision kha DP&AR te rawnna angin pawm a ni lo a ni. Tichuan tunah hian khang Nurse 25 te kha lak thar leh turin hma lak mek a ni.

Pu LALRUATKIMA : Pu Deputy Speaker, khawngaih takin procedure lapse a awm chuan a tisualtu khan mawh a phur dawn lawm ni hrem a ni dawn em tih kha kan zawh belh leh a ni.

Pu LAL THANZARA, MINISTER : Chu chu DP&AR lamin an ngaihtuah tur a ni a,

DEPUTY SPEAKER : Hrem leh hrem loh chu sorkar thu a ni a, hrem ngai a. Tuikum bialtu zawrhna kha.

Er. LALRINAWMA : Pu Speaker, Nurse 176 an awm kan ti ta a, tahchuan bedside Nurse kha engzatnge? Side- ah Nurse engzatnge chhuak tih kha a ni e.

Pu LAL THANZARA, MINISTER : Pu Deputy Speaker, Staff Nurse 157 an awm a, Ward Sister leh Superintendent 17 an awm a, Nursing Superintendent 2 an awm a, tichuan a vaiin Nurse 176 an awm a ni.

Kan sawi tak ang khan Indian Council Nursing Norms ang chuan tun dinhmunah hian Civil Hospital-ah khum 266 a awm a, Nurse pakhatin dam lo 9 shift tinah a enkawl tur a ni. ICU-ah Nurse pakhatin damlo pathum a enkawl tur a ni tih a ni a. Labour table hi 4 a awm a, Nurse 2 in table pakhat an vil tur a ni a. Operation table 10 a awm a, Nurse 2 in table pakhat an vil tur a ni. Nurse te hi 24hrsX7 days shift thum duty tur an ni a, 30% leave reserve neih a ni bawk a. Nurse 176 neih ah hian 53 nurse leave reserve a ni a. Hei hi kar tin two days off leh leave dang ni tura ngaih a ni tih kha Department lam atanga kan han chhan theih chu a ni, Pu Deputy Speaker.

DEPUTY SPEAKER : House Leader i lo sawm ang.

Pu LAL THANHAWLA, CHIEF MINISTER : Staff Nurse Public Service Commission-in a lak kha cancelled a ni lova, sorkarin a pawm rih lo a ni. A chhan chu procedural lapse awm nia hriat a nih avangin. Tin, procedural lapse a

awm hian, khatiang lapse siamtute kha rawng takin sorkarin a hrem zung zung lem lo, tha takin a examine thin.

DEPUTY SPEAKER : Awle, Starred Question no. 23- na zawt turin Dr. K.Beichhua i lo sawm ang.

Dr. K. BEICHHUA : Pu Deputy Speaker, ka lawm e. Minister zahawm tak UD&PA changtu hnena ka zawhna chu – Aizawl khawpui chhungah SIPMIU hmalakna in tui dahkhawlna khawi hmunah te nge siam a nih? Tute nge contractor? Estimate amount leh an zawh hun tura tih ah an zo thei em tih ka zawhna a ni e.

DEPUTY SPEAKER : Chhang turin a changtu Minister zahawm tak Pu Zodintluanga i lo sawm ang.

Pu ZODINTLUANGA, MINISTER: Pu Dy Speaker, member zahawm tak Dr. K.Beichhuuaa zawhna Starred Question no. 23-na chhanna chu –

SIPMIU hmlakna in tui dahkhawlna heng hmunah te hian siam a ni.

1. Project 1 hnuaiah
2.
 - (i) Mission Vengthlang
 - (ii) 7th Day Tlang
 - (iii) Govt. Complex, Luangmual
 - (iv) Tlangnuam
 - (v) Zemabawk
 - (vi) Bawngkawn
 - (vii) Armed Veng
3. Project – 2 hnuaiah
 - (ii) Hlimen
 - (iii) Tanhril
 - (iv) Mualpui
4. Project – 3 hnuaiah hian heng hmunahte hian siam mek leh siam tum an ni.
 - (i) Ramhlun, PWD Mual
 - (ii) Phunchawng
 - (iii) Sihphir 1
 - (iv) Sihphir 2
 - (v) Sakawrtuichhun
 - (vi) Hangi Lunglen Tlang
 - (vii) Lawipu
 - (viii) Central Jail
 - (ix) Tuivamit.

Heng bakah hian ruahtui dahkhawlna (rain-water harvesting) tur tuizem heng hmunah te hian siam a ni ang.

- (i) Sihphir
- (ii) Bethlehem
- (iii) Bethlehem Vengthlang
- (iv) College Veng
- (v) Thuampui
- (vi) Melthum
- (vii) Tlangnuam
- (viii) Ramhlun near Hrangchhuana High School.
- (ix) Chaltlang near Chaltlang Higher Secondary School
- (x) Rangvamual.

Contractor hming : SIPMIU hnuaia hnate hi contract package I, II leh III-a siam a ni a, Asian Development Bank procurement guideline angin contractor thlan a ni a, thawktu chu M/s SS Construction, Chaltlang, Aizawl a ni.

Estimate/Contract amount te chu :

Project – I Estimate/Contract amount chu ₹ 4,31,57,393 (cheng vaibelchhe li nuai sawmthum pakhat singnga sangsarih zathum sawmkua pathum) a ni.

Project – 2 Estimate/Contract amount ₹ 2,85,99,005/- (cheng vaibelchhe hnih leh nuai sawmriat panga singkua sangkua leh chengnga) a ni.

Project – 3 Estimate/Contract amount ₹ 12,00,54,884/- (cheng vaibelchhe sawmpahnih singnga sangli zariat sawmriat pali) a ni.

Zawh hun tur chungchang :

Project – I hnuaia contract hna hi thawh hun tiam chung thla 18 (sawmpariat) ah thawh zawh a ni lo a, Asian Development Bank remtihna lak a nih hnu ah thla 9 (kua) dang hun pek belh a ni a, 2010-2012 chhungin thawh zawh a ni.

Project – 2 hnuaia contract hna hi thawh hun tiam chung thla 12 (sawmpahnih) – ah thawh zawh a ni lo a, Asian Development Bank remtihna lak a nih hnu ah thla 6 (ruk) dang hun pek belh a ni a, 2012-2014 chhungin thawh zawh a ni.

Pu Dy. Speaker, Project 1 leh Project 2 hi a hun takah zo lo mah ila hemi Project hi North Eastern Region Capital Cities Development Investment Programme (NEICCDIP) hnuaiah hian North East State zawng zawng te hi a ruala hna pek kan ni a, hemi project 1 leh 2 an zawh that avangin. State dang chuan project 1 pawh hi an zo thei lo a. Hemi project 2 leh 3 a pawisa tur te hi ADB, a funding pe tu ten kum 2019-a zo tura tih a nih avangin project, anni ngaihdanah chuan a hun taka zo anga ngaih an nih tho avangin, State dangin an hman tur zawng zawng kha cancel in Mizoram hi crore 300 chuang min rawn pek belh a. Chu chu project 3 atan hian Aizawl hi tui darkar 24 haw thei turin hmalakna kan nei a. Tunah hian tender kan chhuah a khutah Setlak lui atanga Laipuitlanga pump chho turin. Kan tender zawng zawng te hi tunah ADB in Delhi ah an la kawl mek a, scrutiny an ti a, tun atanga reilote ah work order pek kan beisei a ni.

Tin, project 3 hnuaiia contract hna te hi tunah thawh mek a ni a, November 2018-a zawh hman tura beisei a ni. Ka lawm e.

DEPUTY SPEAKER : Zawh belhna a awm em ? Dr. K. Beichhua.
Zawh belhna kha ti law law sela, zawh belh duh an awm a, Pu Vanlalzawma.

Dr. K. BEICHHUA : A chhang chiang khawpin ka hria a, Pu Deputy Speaker. Zawhbelhna pakhat ka nei a. Project 3, Aizawl 24 hours a pe thei tura ruahmanna ang chi kha district dangah ruahmanna siam ve a ni em?

Pu VANLALZAWMA : Pu Dy. Speaker, ka lawm e. A main question chhanna kan hmu a. Chutihlai chuan hmalak tumna te pawh kan Minister zahawm tak khan a rawn sawi chho a, khang a rawn sawi chhoh zingah khan, ka hriatsual loh chuan he House-ah pawh hian tum hnih ka sawi chhuak tawhin ka hria a, saw lai Khatla tlangah tuna kan Minister te leh kan Parlimentary Secretary te awmna bulah sawn tuizem lian deuh mai siamna tur ram pawh kan sorkar leh khawtlang hruaituten reserve an nei a. Saw, tuna tuizem awm mek sawn connection 5000 chuang a chawm a, (nikum hmasa lama ka hriat dan chuan) tunah pheih chuan chu ai chuan a tam tawhin ka ring a. Kan New Secretariat Complex zawng zawng te, Police Headquarter te leh sawtah CID ho hmun te leh helai veng bawr hrim hrim chawmtu saw a hmaa kan sawi pawh khan siam tur ang deuh khan kan Minister zahawm tak khan a sawi tawh a, tuna siam thar turah khan a tello tlatin ka hria a, kha kha enge a chhan min hrih thei em?

Er. LALRINAWMA : Pu Dy. Speaker ka lawm e. Project kha a hun taka zawh a nih loh avang khan sum leh pai sen belh a awm em? Awm ta se engzatnge?

DEPUTY SPEAKER : Khang zawhbelhna pathum te kha chhang turin Minister zahawm tak i lo sawm ang.

Pu ZODINTLUANGA, MINISTER : Pu Dy. Speaker, member zahawm tak zawhna neitu Dr. K. Beichhua zawhna kha chu, he project hi nichina ka sawi ang khan North Eastern Region Capital Cities Development Programme tih a ni a, khawpui/capital chauh a khawih theih avangin hemi programme ah hi chuan khawpui dang hi kan khawih thei lo a ni tih kha ka chhanna a ni.

Member zahawm tak Pu Zawma zawhna kha, Khatla saw hemi project ah chuan a awm lo. Amaherawhchu, NEDP atangin tun kum financial year ah hian kan ti thei turah kan in beisei a, hma kan la mek a ni tih kha ka chhanna a ni a. Kan ngaipawimawh a, sawlai hmun saw, a funding tur hi kan dap nasa thin a, saw hmunah sawn tanky lian kan dah chuan sawlai veng zawng zawng Maubawk te, New Capital Complex tih zawng zawng saw tui hnianghnarin kan pe thei dawn a. Saw saw keini pawh department angin kan vei ber a ni tih kha ka rawn sawi duh a ni.

Tin, member zahawm tak Er. Lalrinawma rawn zawhna kha, tih muan belh kha sen belh lampang ai mah khan, nichina sawi ang khan kan thawh that avang khan crore 300 chuang hi reward kan dawng zawk a ni. Ka lawm e.

DEPUTY SPEAKER : Saw lai Khatla tlang hmun awl saw Deputy Speaker designated bungalow atan en a ni a. Amaherawhchu, PHE in tuikhuah lian zawk siam se tih a ni a, chuvang chuan mipui tam zawk chhawr theih tur a nih avangin Assembly lam chu kan ngawi ta a, an hman tangkai lawk loh chuan Deputy Speaker bungalow sa mai ila a tha ang a. Starred Question no.24-na zawt turin Er. Lalrinawma i lo sawm ang.

Er.LALRINAWMA : Pu Dy. Speaker, ka lawm e. Ka Starred Question no.24-na kan Finance Minister zawhawm tak hnena ka zawhna:

- a) Mizoram Finance Commission pakhatna report angin, kum 2015-2016 chhungin VC te tan sum engzatnge ruahman a nih?
- b) Heng sum te hi engtikahnge release a nih ang?

DEPUTY SPEAKER : Chhang turin a changtu Minister Pu Lalsawta i lo sawm ang.

Pu LALSAWTA, MINISTER : Pu Dy. Speaker, member zahawm tak Er. Lalrinawma zawhna chhanna chu hetiang hi a ni.

- a) Mizoram State Finance Commission pakhatna report ang a kum 2015-2016 chhunga VC te tana sum ruahman chu, ₹ 21,20,35,000/- (cheng crore) sawmhnih pakhat, nuaih sawmhnih, singhnih leh sang nga) a ni tih a ni a.
- b) Heng sum te hi engtikah nge release a nih ang tih chhanna chu hetiang hi a ni.

Mizoram State Finance Commission pakhatna hi 2015-2016 financial year sum pekna turah he report hi Mizoram sorkar in a la pawm loh avangin hman a la ni lova. Chuvangin, 2016 a sorkar in State Finance Commission pakhatna report a pawm hnua local body te hnena sum release na tura sorkar in office memorandum No.A.11011/1/2016/FMC-Dt.4.5.2016 (a copy hetah hian enclosed a ni a) a tihchhuah para 3 ah chuan, local body te hnena pawisa release tur chungchangah, 2015-2016 (kum liam ta a nih chu) atan Mizoram Finance Commission in recommendation a lo siam chu, pawisa liam tawh (lapse) anga ngaih tur a ni ang a, arrear emaw, installment emaw angin state sorkar hnenah phut theih a ni lo tiin hriattir an ni a. Sorkar in hetiang thu tlukna a siam fel tawh avangin, kum liam ta 2015-2016 atan bika Mizoram State Finance Commission in pawisa a lo recommend hi release a ni dawn lo tih a ni.

DEPUTY SPEAKER : Zawh belhna a awm em? Awm lo maw? Starred Question no.25 hi zawhna intawm Pu R. Vanlalvena leh Er. Lalrinawma a ni a, Pu Vena hi ziah hmasak a ni a, lo sawm ila.

Pu R.VANLALVENA : Ka Starred Question ka zawh hma in Unstarred Question kha han sawi hmasak ka duh a.

Pu Dy. Speaker, i phalna in Unstarred question ka zawhna Handloom Development chungchang nuai zali sawmthum pariat chuang hmanna kha, cheng engzah theuhin nge pek an nih tih ka zawhnaah khan, Handloom Development Corporation Society te balance sheet a zirin an tanpuina dawn hi a in zat lo tiin min chhang a.

Unstarred ah kha kha ka'n zawhna kha a rawn thelh riau mai a, engtia tih tur nge chu ka hre lo a. Mahse, he House ah hian min chhan dan kha ka tum loh zawkin min chhang tih erawh kha chu... (DY SPEAKER: Chu chu Health Deptt. ho ami?) Ni lo, Co-operation Deptt. ho, Pu Dy. Speaker, ka han sawi hmasa a nih chu, min chhan dan kha a mak teh daih em a. Ka Starred Question no.25, Pu Rinawma nen kan zawhna a lo inang a, intawm lo in. Chumi zawhna chu Health Minister zahawm tak in min chhan atan: -

- (a) RSBY hian BPL chhungkua engzat nge a neih? Heng BPL te hi engtik kum ami nge ?
- (b) Tun dinhmunah Mizoram State Health Care Scheme leh RSBY
hnuaiiah chhungkaw enrollment engzatnge awm ?
- (c) Mizoram State Health Care Scheme hnuaiiah chhungkua enrollment te hi a category wise in engzat theuh nge an nih ?
- (d) Tun dinhmunah Mizoram chhungah RSBY Scheme empanelled hospital engzatnge awm ?
- (e) Heng empanelled hospital zingah hian cashless facility kal pui theih lohna damdawiin a awm em ?
- (f) Lo awm ta se, engvanga kalpui thei lo nge an nih ? Ka lawm e.

DEPUTY SPEAKER : Chhang turin Minister zahawm tak Pu Lalthanzara i lo sawm ang.

Pu LAL THANZARA, MINISTER: Pu Deputy Speaker, ka lawm e. Pu R.Vanlalvena leh Er.Lalrinawma te zawhna inang Starred Question no.25-na chhanna chu :

- (a) Kum 2016 policy ah mi 137804 BPL chhungkua an awm. Hemi list hi kum 2013 a siam leh 2015 a belh leh te an ni.
- (b) Tun dinhmunah Mizoram state health care scheme leh RSBY scheme hnuaiiah chhungkaw enrollment zat chu 2016-2017 RSBY ah 195083.
- (c) Mizoram State Health Care Scheme hnuaiiah 152635 Mizoram State Health Care Scheme hnuaiiah chhungkua enrollment te hi a category wise in kum 2016-2017 BPL 113082, Job Card holder 18987, APL 20566. Total : 152635 an ni.
- (d) Empanelled hospital 101 a awm. (Public Hospital – 81, Private Hospital – 20) te an ni.
- (e) Awm e tih a ni.
- (f) 1) Kum kalta lama company atanga bill chhuah muan thin vanga sum in ban let hman lo experience avangin.
- 2) RSBY rate a sang tawk lo tih vanga private hospital thenkhatin RSBY atanga bill theih chin bak damlo hnen atangin an lo la thin. Hei hi scheme kalphung pel a nih avangin hriat chhuah a nih veleh private hospital te hrih nghal an ni a, tun dinhmunah chuan report kan dawng lo a ni.
- 3) Internet connection that tawk loh avangin zokhaw lamah te harsatna an tawh vantage a ni a, empanelled hospital zingah hian cashless kalpui theih loh a ni. Pu Deputy Speaker, ka lawm e.

DEPUTY SPEAKER : Zawhbelhna a awm em? Aw, Er. Lalrinawma i lo sawm ang.

Er. LALRINAWMA : Pu Deputy Speaker, Health Care Scheme hmanga damlo ten damdawiin awm man kan va bill ve dawn hian eng rate nge hman a nih tih hi min chhan theih chuan a lawmawm khawpin ka ring a. Tlema han sawi zau kan duh a tawite in, sorkar mi leh sa te chuan private damdawiin ah an awm a nih pawhin an bill ang ang kha an va theh lut a, an va bill mai a, Amaherawhchu Health Care Scheme ah hian cheng 500 man te, cheng 1000 man te kan va enroll a, kan damlohna bill ang ang te kan va theh luh hian a zat ang chiah kha a chhuak thei tawh thin si lova, a buaithlak khawp mai a. Kan in enroll a, kan in insure a nih ve rau rau kha chuan kan in enkawl na man ang kha chu han hmu ve thei ila a lawmawm khawpin ka ring a. Helai hi eng rate nge kan hman? Eng tlawh chhanin nge private damdawiina rawn kal bill te kha kan lo siam rem sak thin tih lai kha min hrilh theih chuan a lawmawm khawp ang.

DEPUTY SPEAKER : Dr.K.Beichhua i lo sawm ang.

Dr.K.BEICHHUA : Tun dinhmunah hian cheng engzat nge bill tang la awm, tih kha ka zawhna pakhatna nise, Bill tan chhan hi a chhan pawimawh ber tur enge ni ? tih ka zawh belh a ni e.

DEPUTY SPEAKER : Pu Vanlalzawma i lo sawm ang.

Pu VANLALZAWMA : Pu Deputy Speaker, ka lawm e. Health Care Scheme leh RSBY a awmte hian kan hmang tangkai khawpin ka hria a. Registration ti zat kha kha kan Minister zahawm takin a sawi tawh a, engzat percent in nge hmang a, engzat percent in nge hmang lo tih hi a hriat theih em aw ka hre chiah lova. Engpawhnisela, chumi dawta kan zawh duh chu an zavai vai chuan registration ti zawng zawng hian an hmang lovin ka hria a, hman kan han tih ah pawh khan hmanglo hi an lo tam khawp mai a. Chutih mek lai chuan a hun laia tih nachang hre lo te, tin, ngaihsak vak lo hrim hrim te, engemaw remchanglo te pawh hi an awm nualin ka hria a, member zahawm tak tak te pawhin Pu Deputy Speaker, kan hre nualin ka ring a. An han damloh tak sia lo la ti si lo te hi emergency deuha tihsak theih dan a awm em ? A zavai vai hian pawisa kha kan hmang leh chuang bawk si lo tih kha ka zawhna a ni.

DEPUTY SPEAKER : Tikhan pathumin an zawh belh tawh a, kan duh taw ang a. A chhan theih theih chhang turin a changtu Minister zahawm tak Pu Lal Thanzara i lo sawm ang.

Pu LAL THANZARA, MINISTER : Pu Deputy Speaker, Tuikum bialtu MLA zahawm tak zawhna Health Care Scheme hi eng rate nge tih chhanna kha chu Central Government Health Care Scheme rate hman a ni tih a ni. Tin, Dr. Beichhua zawhna kha bill tang engzat nge ? A chhan enge ni tih zawhna kha chu RSBY 2016-2017 ah hian bill tang a awm lo, tin, RSBY bill tang 2016-2017 ah khan guide line angin pek an ni. Tin, kan opposition group leader zahawm takin a zawhna kha chu, nia a in register zawng zawng hian Pu Deputy Speaker, an hmang vek lova. Amaherawhchu a bak engzat percent in nge hmang tih vel kha chu nakinah zawhbelhna dangte nen khan ziakin kan la pe dawn nia. Ka lawm e.

Pu VANLALZAWMA : Emergency a tih chawp dan a awm em, an han dam loh takah khan khalai te kha.

Pu LAL THANZARA, MINISTER : A buaithlak khawp a, hetiang hi a hunlaia ti si lo, a hnua ti leh hi Pu Deputy Speaker, an awm thin a. Amaherawhchu kumin ah phei chuan kan MLA zawng zawng te leh kan Local Council te leh YMA te punin registration an tihna turah khan nasa thei ang berin kan thehdarh a, khati pawha rawn tilo kha chu tihsak kan remti tawh lo a ni.

DEPUTY SPEAKER : Heng hi insurance ang deuh hi a ni a, motor insurance pawh hi motor a accident dawn nge dawn lo kan hre lova, kan va insure a, accident chu a awm zeuh chauh a, kha kha a accident tawh hnu ah emaw insure tum kha chu thil theih loh tawp a ni. An damloh tawh hnua tih thar tih ang kha thil theih loh a ni. Awle, Starred Question 26-na zawt turin Pu Lalruatkima i lo sawm ang.

Pu LALRUATKIMA : Pu Deputy Speaker, ka lawm e. Ka zawhna Starred Question no.26, GAD changtu Minister zahawm tak chhan atan:

- (a) Government Complex, Luangmual-ah hian sorkar in ram a nei em ? A neih chuan engtiata zau nge ?
- (b) Revenue pass engang nge a neih ? Revenue pass hi engtik kumah nge neih a, a pass no. engte nge ?
- (c) Government Complex huamchhunga sorkar ram mimal etc nei tawh an awm em ? An awm chuan mi engzatnge awm ?

DEPUTY SPEAKER : Chhang turin a department changtu Minister zahawm tak Chief Minister i lo sawm ang.

Pu LAL THANHAWLA, CHIEF MINISTER : Pu Deputy Speaker, khulai velah khuan khawi chin chiah khu nge Government Complex ram tih hi demarcation chiang tak a awm lova. Tin, tuna mimal awmte khu nge hmasa a, Complex an tih hnu-a sorkar in a sak te tih te khu chu chiang takin hriat a ni a. Tichuan, tunah khuan sorkar in sak sa te kan neih avangin High Court kan mamawh a, High Court ho kha awm turin kan ti a. Pu Swaraj Kaushala hun lai khan kan pahnihin kan zuk en a. ‘ Building awm sa hi High Court kan mamawh tawh si a, neih thuai kan duh a, hei hi luah phawt rawh se,’ kan ti a, tun thleng hian an awm ta a. Ama’ rawhchu, chuti chungin liabilities pawh an la siam mumal lo a lo ni a. Tichuan, Ramthar veng hnuaiyah lei tlahniam a awm a, chhungkaw tam tak a nghawng a. Chu chu a hlauhawm avangin khutah khuan kan sorkar hun hmasa lamah khan kan awm tir a. A hlauhawm loh hnu-ah khan thenkhat an kir leh a, mahse thenkhat kir ve remchang ta lova inggai awm hlen ta te pawh an awm nual a. Chutiang chu a ni a. Chuvangin, Mizoram sorkar chuan 1970, 1980 chho vel khan sorkar office, resident quarters leh tul dang atan Luangmual ramah ram a acquire a, ram neitute hnenah compensation pawh pek an ni. Sorkar quarters tam tak sak a lo ni ta a. Chung quarters chu GAD kutah dah a ni a, a enkawl hna chu PWD kutah a awm thung. 1970 khan ram engemaw zat lak belh a ni a. Heng acquired area hi survey mek a ni a. A zau zawng chiah hi hriat a la ni lova, mahse, 114 hectares vel ni tura rin a ni a.

Tin, he acquired area atan hian Revenue Department chuan pass a pe chhuak lova. Sorkar in ram a acquire tur tuna mi tam tak an chenna area chin hi 2010

khan survey a ni a. Hemi huam chhungah hian mimal, sorkar, Department leh pawl hmingin hetiang hian pass pek a ni.

- Sorkar Departments :
- 1) School Education Department
 - 2) Sports Department
 - 3) Presbyterian Church
 - 4) The Salvation Army
 - 5) MHIP
 - 6) Mandir
- Mimal pekte : LSC neite :
- 1) Roparvuli
 - 2) B.Lalrinkima
 - 3) Lalriliani
 - 4) Solomona
 - 5) Dr.Lalsangluaia
 - 6) Dr.Lalthangliana & family
 - 7) Thangridema & family
- House Pass neite :
- 1) Lalsiama Fambawl
 - 2) Rebeki w/o S.Lianzuala (L) & family.

Government Complex chhunga ram nei sorkar department tih hi sorkar department leh land lease holders tihna a ni a. Sorkar department leh Kohhran leh pawl land lease neite tihna a ni. Government Complex, Luangmual chingfel tur leh encroachment hi chi hrang hrang awm ni a hriatte enfel turin task force din a ni a. Chief Secretary in a ho va, Secretary rual member an ni. Hei hi ni 22.2.2016 ah din a ni a, notification chhuah a ni. Tin, meeting pawh vawi 2, vawi 3 an nei tawh a, chutiang chu a ni.

Tin, ka hmeichhe kawh Lalriliani hming a lo lan ve avangte pawh hian he zawhna hi a lo kal a ni mai thei a. Helai ram hi Luangmual VCP Pu Challiana te, Pu Tera kan ti mai a, a hmingpum pawh ka hre lova, chungte chuan B.Lalrinkima an pek a ni a, tin, Complex ram a ni lova. Tichuan, B.Lalrinkima hi ka kawh ve hian cancer a vei lain a lo enkawl ve thin a. Chumi lawmthu sawi nan chuan a hleh thlak ve ni awm tak a ni. Pu Deputy Speaker, thamna ni lovin, lawmthu sawina a niin ka hria, chutiang chu a ni.

Tin, tunah hian encroachment hrang hrang, Complex area ni a hriatah te khuan a awm nual avangin sorkar in enfiah turin Committee pawimawh tak Chief Secretary meuh hova din a ni, Pu Deputy Speaker.

DEPUTY SPEAKER : Zawhbelhna Pu Lalruatkima.

Pu LALRUATKIMA : Pu Deputy Speaker, kan House Leader zahawm tak khan a rawn chhang a. Khang zozai kha mimal emaw, pawl emaw nei kha an awm kan hre hran chuang lova. Chutihlai chuan, encroachment khu kan ngaihthlak tak ang khan a nasa khawp mai a. Sorkar ram niin mi tam takin kan ngai si a. Chulaih chuan sorkar in a humhalhna kawngah hian tan kan la tawh lo deuh tih chu a lang a. Kum 30 chuang zet mai land lease pawh nei lova kan awm kha a zia lova, tih ran hle chu a ngai a ni tih kha a lang a.

Tichuan, kha mi baka ka zawhbelhna chu Pu Deputy Speaker, DC Staff quarter ram Tuikhuahtlang hi pawl emaw, kohhran emaw te nen inthleng tum a ni em? Tum ni se eng vanga inthleng tum nge ni a tih leh Office Memorandum ni 26.6.2001 ami kha repeal a ni tawh tihna em ni tih kha ka zawhna a ni e.

DEPUTY SPEAKER : Pu K. Sangthuama.

Pu K. SANGTHUAMA : Pu Deputy Speaker, ka lawm e. Khawngaihin tawite han sawina hun ka dil nghal che a. A tawpah zawhna ka siam ang e. Khutilai khu a rei ta khawp mai a. Engemaw zat khu an in settle tawh si a, pass an nei bawk si lova, a buaithlak khawp mai a. Chuvang chuan, sorkar hian ngun taka a ngaihtuah a ngai a. Han inhnawhchhuah leh hleihtheih pawh a ni tawh si lova. Tin, a thu hrim hrimin land lease hi sorkar khan khutah chang lo pawh hian a ngaihtuah tha vak thin lova. Entirnan, Chief Engineer Office thin pawh khi tunhma in an nei lova. A ram emaw a tih chin kha ni si lovin mimalin tam tak an sat thla a, chu mi hnu-ah an siam chauh a. Tin, Muanna kudam pawh saw land lease kha an lo nei lawk lova, charge ka'n lak ve khan, ' a rang thei ang berin siam teh u, mimalin min hlehthlak sak zo mai dawn alawm,' ka ti nghe nghe a. Chutiang chuan tunah pawh land lease kan la nei lo a nih chuan sorkar ram kha a ni thei chuang lova. Chuvang chuan, a rang thei ang bera siam ni sela a that ka'n ring a.

Tin, tuna mi tam tak in sa tawh si, concrete te, temporary a sa te hi tam tak an awm a. Khung zawng zawng khu LSC pek mai ni se tih kha vawiinah hian rawtna siam ka duh a. Khutilaia LSC neilo zawng zawng khu eng sorkar pawh ni se ka rin dan chuan an hnawtchhuak vakin ka ring lova. A tihngaihna tak tak a awm tawh lo. Chuvangin, nei an lo tam tawh si a, a awm sa kha chu awm mai se, nei mai sela, chu chu a that ka'n ring a. Kan Chief Minister zahawm tak hian min chhang thei em? Tuna LSC la nei lo, pass la nei lo, in sa tawh si te khu chu an zavai khuan LSC a pek theih mai lawm ni tih kha ka'n zawt duh a ni.

DEPUTY SPEAKER : Zawhbelhna a awm em? Awm lo maw? DC Staff quarter, Tuikhuahtlangah te a kai chho a. Engtinngge chhan theih a ni em ka hre lova. Chief Minister zahawm tak a chhan theih theih chhang turin i lo sawm ang.

Pu LAL THANHAWLA, CHIEF MINISTER : Pu Deputy Speaker, in tihmingchhiat tumna lampang zawnga la lova, understanding tha tak leh a problem leh difficulties te appreciative deuh taka member thusawi thin an awm hi a lawmawm ka ti a. Member zahawm tak Pu Sangthuama'n a rawn sawi pawh kha sorkar a hminga ding lai nih chuan thil lawmawm tak a ni. Ka sawi tawh ang khan sawlai lei tlahniam a chhungkaw mangang 10 tel kan zuk dah a. A then an kir leh a, a then an kir lova. Khang angte kha chu physically a evict chi niin kan hre lova. Hei leh chen hi kum 10 tel an awm tawh a, chutiang chu a ni a.

Engpawhnisela, khulai ram khu a pawimawh a, kan hotute pawhin in ngai pawimawh a. New Economic Development Policy atangin cadastral survey leh a hungna tur atan ₹ 50,00,000/- vel lai tunah dah hran tawh a ni a. Chu chu a department concerned ten an hmang ang a.

Tin, lo in settle laklawh tawhte kha chu physically a kan evict chuan khawilai lai emaw atang chuan sorkar rawng tak in ni min ti ang a, min bei leh dawn tho tho a. Sorkar rawng tak nih kha chu kan duh dawn bik lova.

Tin, encroach lui tam tak an awm a. A chhan thenkhat chu an mangan vang te, an harsat vang te a lo awm tawhte an ni a. Tin, zep nak emaw sorkar hian strict takin a mit a len lem lova. Kha leh chenah khan tu te pawh lo sorkar ah khan, chutiang chu a ni tawh a, Chuvangin, tuna hriatthiamna tha deuh nei a member zahawm tak Pu Sangthuama rawn sawi ang deuh te pawh kha sorkar kalphung tur pawh hi a ni lovang tih a sawi theih lova. Ama'rawh chu, cadastral survey te han nei phawt sela, concerned department ten an recommendation leh an thil hmuh dante pawh thehluh a la tul ang a. Chung ang hnu-ah chuan sorkar in a tul angin inngaihnamna tha tak neiin a la ngaihtuah turah ka ngai mai a.

Sorkar department tih hi sorkar department tih leh land lease holders an ni deuh ber a khulalah kuan. Tin, sorkar department leh kohhran leh pawl land lease neite an awm nual bawk a. Tin, kohhran hi mihringte an lo pung zel a, kohhran a lo lian lutuk a, mihringte kan lo pung zel a, in lak hran ngaite a lo ni thin a. Kan hun hmasa lamah pawh khan kan buai thei hle a. Sorkar ram lo hi chu a awm mang si lova. Tum khat chu Tuikhuahtlang-a kan awm lai khan kohhran hrang hrang hruaitute a rualin an lo kal a. 'Nangni ho pawh hi engatinge maw ni le sorkar ram chauh hi in melh le, mimal ramte pawh hi acquire dan te pawh hi ngaihtuah ve ula, lei dan te pawh ngaihtuah ve ula,' ka lo ti a. A chal deuh ber chuan vantlang inkhawmah pawh nang tehluh pawhin 'ram chu Lalpa ta a ni, i ti a, a neitu thu thu a ni i ti a. Keini hi a neitu Lalpa aiawhte kan ni a, chuvang chuan kan thu in awi tur a ni,' min ti a. Ka dang ti tih deuhlek a, a buaithlak angreng khawp a. Chuvangin, kohhran chungah hi chuan kan theih ang tawkin rawngbawlna a ni ve ang chu maw kan ti a, keini Aizawl tlangval khawlai mi mah ni ila. Chutiang chu kan lo ngaihtuah tawhna leh kan lo kal tawh dan chu a ni a, kan sahtlak nual a ni. Sorkar pawh kan chep phah khawp a.

Tunah hian DC Staff quarter Tuikhuahtlang hi Lai ram Isua Krista Baptist Kohhran hotute pawh hian vawi duailo min rawn hmu tawh a, thu tlukna siam a har khawp a. A diltute ngaihdan hi chuan a awlsam khawp a. An han sawi vel a, a awlsam khawp a, sorkar tan khan hloh tur reng reng a awm lova. Ama'rawh chu, han bih chian chuan a tuartu tur ber chu sorkar chu a ni lawi bawk si a. Kohhran hruaitute pawh hian thu dik tak chu an sawi bik lo emaw ni aw, anmahni hamthatna tur atan chuan tih te pawh hi a ngaihtuah theih rum rum a. Chutiang vel chu a ni Pu Deputy Speaker. Thutlukna leh chutiang khatiang chu a ni ang tih chu a la awm lova, an dil a sorkar hnenah. An dil chuan sorkar chuan 'Aw' emaw 'Aih' emaw chu an la ti dawn chu a ni ang a, hun in a la hril ang chu.

Tin, sorkar ram an rawn dil hi kan hun hmasa lam daih tawh Tuikhuahtlang-a kan awm lai atang tawh khan a ni a, a thlengna in nei tal tur a ni kan ti thin a. Thenkhat sorkar ram kan pekte hi chuan a thlengna ram an rawn pe ve bawk thin a. Chutianga insiamremte chu a awm a. Engpawhnise, kohhran chu rinna lama chak lo ber pawhin kan zah lo thei lova, zah tlaka an awm pawh kan duh a. Chuvangin, kan ngai pawimawh a ni.

Tuna DC Staff quarter Tuikhuatlang an tih kher kher hi chu kan hotuten ngaihtuahna/decision an la siam rih lo Pu Deputy Speaker.

DEPUTY SPEAKER : Pu Sangthuama rawn sawichhuah Muanna Godown, Muanna veng pawh kha tuna kan Supply Minister leh kan Revenue Minister zahawm tak ten tun ah hian an chingfel mek a ni, a lawmawm khawp mai. Aw le, Starred Question no. 27-na zawt turin Dr. K. Beichhua i lo sawm ang.

Dr. K. BEICHHUA : Pu Dy. Speaker, ka lawm e. Food, Civil Supplies & Consumer Affairs changtu Minister zahawm tak hnenah Starred Question no. 27-na hi ka zawhna a ni e.

DEPUTY SPEAKER : Chhang turin Pu John Rotluangliana i lo sawm ang.

Pu JOHN ROTLUANGLIANA, MINISTER : Pu Deputy Speaker, member zahawm tak Dr. K. Beichhua zawhna Starred Question 27-na.

Chhanna chu - a) Tun dinhmunah Mizoram mipuite hnenah buhfai thla khatah quota a full in vawi khat sem tura tih a ni a. Ama'rawh chu, helai hi hmun thenkhatah chuan thla khata mahni quota la thei lo te an awm avang khan harsatna a awm a. Siam rem ngaite a awm a. Chuvang chuan, thla khata vawikhat la thei lo te chu thla khatah vawihnih la turte pawhin ruahmanna kan officer te leh staff ten an siam sak a ni.

(b) Mi pakhat tan thla khatah kg engzata sem nge a nih? tih a ni a. Mi pakhat tan thla khatah hetiang hian sem a ni :- 1) AAY – Chhungkaw khat tan 35kgs. Hei hi chu a mimala pek an ni lova, family a pek an ni a. An family a tlem deuh pawhin an kham deuh tihna a ni mai a. An tam deuh pawhin 35kgs kha a pelh theih chuang loh.

Tin, PHH kan ti a, (Priority Household), National Food Security Act hnuai ami hi mi pakhat tan 5kgs pek tura central sorkar in a ruahman a ni a. Ama'rawh chu, 5kgs hi thla khatah mi pakhat tan a tlem a, an kham dawn lo tih hriat a nih avangin Mizoram state sorkarin 3kgs a pek belh leh a. Hetah hian Food Security Act hnuai buhfai la te hian rate chi hnih an nei ta a. 5kgs ₹ 3/- per kg, 3kgs ₹ 15/- per kg in an la ta a ni.

Tin, hemi National Food Security Act in a huam ve loh zawng zawng hi mi pakhatah 8kgs, thla khat atan ₹ 15/- per kg a pek a ni a. Hei hi India ram hmun dangah chuan Food Security Act hnuai chauh hian ration hi sem a ni a. Ama'rawh chu, Mizoramah chuan tun hma atangin a mipui mimir zawng zawng pawh khan kan lo lak thin avang khan han tih tawp tawp chu tuna kan sorkar hian a tha a tih loh avangin kan hotuten ngun taka an ngaihtuah hnu-in hemi Food Security-in a huam loh zawng zawng pawh hi pek vek ni rawh se tiin 8 kg theuh pe turin ruahmanna a siam ta a ni. Tunhma chuan naupang tan thla khatah 4kgs, puitling tan 8 kgs a ni a. Tunah chuan buhfai hi naupang tan pawh Ration Card an siam laia birth certificate an neih chuan 8 kgs vek pek an ni a. Chuvangin tunhma ai khan hemi Food Security Act hman hnu ah hian buhfai pawh hi mipui mimir hian an dawng tam zawk a ni tih kha ka chhanna a ni e. Ka lawm e.

DEPUTY SPEAKER : Le, kan Question Hour a tawp tlat mai, zawh belhna pawh lak hman a ni ta lo a ni. Vawiinah member House attend thei lo phalna pekte : Pu Lalrinmawia Ralte, Pu C. Ngunlianchung, Pu S. Laldingliana, Lt. Col. Z.S. Zuala te an ni.

Pu VANLALZAWMA : Pu Deputy Speaker, khawngaih takin. Kha kan member zahawm tak takte kal loh chhante kan ngaithla a, kan Speaker ber hi a awm loh chhante pawh hi hriat ve theih a ni em aw tih kha?

DEPUTY SPEAKER : Commonwealth Parliamentary Association Executive Meeting, London-ah a awm a, chutah chuan chumi attend tur chuan a kal a ni.

Laying of Papers hun kan hman ang a. Pu Lalrinliana Sailo, Chairman Committee on Public Undertakings-in, “Statement of actions taken by the Government against the recommendation contained on the Fifth Report of Committee on Public Undertakings on the Report of C&AG of India for the year 2007-2008 relating to Zoram Industrial Development Corporation under Commerce and Industries Department” leh “Statement of actions taken by the Government against the recommendation contained in the Sixth Report of the Committee on Public undertakings on the Report of C&AG of India for the year 2010-2011 relating to Zoram Industrial Development Corporation under Commerce and Industries Department” te hi House dawhkanah rawn lay sela. I lo sawm ang.

Pu LALRINLIANA SAILO : Pu Deputy Speaker, tuna kan paper lay tur hi kan hma amite lo thawh a ni a. Rim takin, urhsun takin, thahnemngai takin hna an thawk a, Bangladesh te thlengin an zu thawk a ni a, an titha hle mai. Pu Deputy Speaker, i phalna leh House zahawm tak remtihain “Statement of actions taken by the Government against the recommendation contained on the Fifth Report of Committee on Public Undertakings on the Report of C&AG of India for the year 2007-2008 relating to Zoram Industrial Development Corporation (ZIDCO) under Commerce and Industries Department” a ni a pakhatna.

Pahnihna “Statement of Action taken by the Government against the recommendation contained in the Sixth Report of the Committee on Public undertakings on the Report of C&AG of India for the year 2010-2011 relating to Zoram Industrial Development Corporation (ZIDCO) under Commerce and Industries Department” tih a ni e. Ka lawm e.

DEPUTY SPEAKER : Le, a copy kha sem ni sela.

Le, tunah chuan Presentation of Reports, Pu Lalrinliana Sailo, Chairman, Committee on Public Undertakings bawkin “The Seventh Report of Committee on Public Accounts relating to Commerce and Industries Department” House-ah present turin i lo sawm ang.

Pu LALRINLIANA SAILO : Pu Deputy Speaker, ka lawm e.

Tun ami pawh hi ka hma amite thawh rah a ni a. Sawi tawh ang khan report pawh a ngaihthlak nawmin a bengvarthlak hle a, hna an thawk tak tak a ni tih a lang a. Tichuan i remtihna leh i phalna leh he House zahawm tak remtihna "The Seventh Report of Committee on Public Undertaking relating to Commerce and Industries Department" tih hi ka rawn present e. Ka lawm e.

DEPUTY SPEAKER : A copy kha sem ni sela.

Vawiin hi ni pawimawh tak a ni a, member-ten kan hriat mai maiah. Armed Forces Day a ni a, kan Governor zahawm tak pawhin thuchah ropui tak a siam a. Tin, Air Safety Day, International Air Safety Day a ni bawk a. Tin, Pearl Harbor bomb ni, 1941 Second World War-a Pearl Harbor bomb ni kha a ni bawk a ni. Kawng thumin khawvel huap leh India huap tein pawimawhna a nei a nih chu vawiin ni hian.

Awle, tunah chuan Legislative Bussiness-ah kan kal tawh ang a. Pu P.C. Lalthanliana, Minister zahawm takin "The Mizoram Drug (Controlled Substances) Bill, 2016" hi House-ah introduce han dil sela, i lo sawm ang.

Pu P.C. LALTHANLIANA, MINISTER : Pu Deputy Speaker, i remtihna leh phalnain, "The Mizoram Drug (Controlled Substances) Bill, 2016" hi he House zahawm takah ka rawn introduce e. (DEPUTY SPEAKER – I dil phawt tur.) Introduce ka rawn dil e. Ka sawi zawh hmam mi lo ti.

DEPUTY SPEAKER : Introduce a rawn dil a, kan remti em? (MEMBERS – Remti e). Le, introduce kan remti a, a hmanhmawh em a, introduce pahin sawiho pawh han dil nghal sela, sawiho turin move nghal mai turin i sawm ang.

Pu P.C. LALTHANLIANA, MINISTER : Pu Deputy Speaker, i remtihna leh phalnain "The Mizoram Drug (Controlled Substances) Bill, 2016" chu he House-ah hian ka rawn introduce a. Tin, chumi rual chuan he House zahawm takah sawiho turin ka'n chhawp chhuak duh nghal bawk a ni.

Pu Deputy Speaker, he Bill "The Mizoram Drug (Controlled Substances) Bill, 2016" hi sorkarin i Chairman-na hnuaiah ngun taka Drafting Committee dina a lo en, a lo duan a ni a. Nangma ho ngei maia Chair-a vawiina he House zahawm takah kan han sawiho tur hi a lawmawm hlein ka hria a, a inhmeb bik pawhin ka hria a ni.

Kan sawi thin a, Pu Deputy Speaker, dan hi kan han nei a, kan siam a, a implement hi a pawimawh lehzuol chu a ni. Dan nei reng mah ila kan implement that tawh loh chuan tih te pawh nimirah House-ah kan sawi tawh a. Vawiina kan sawi tur erawh hi chu Dan awm loh avanga harsatna Zoram anga kan tawh te, sorkar anga kan tawhte a ni. A thenah chuan Dan kan neihte kan implement tha tawh lo kan tih lain, a thenah Dan kan nei loh avangin harsatna kan tawh a ni. Chumi chungchangah chuan Mizoram mai ni lo, India ram, khawvel thlengin Pu Deputy Speaker, ruihhlo hman sual hi khawtlang min tibuitu leh ram in harsatna kan tawh a ni a. Chumi zu do leta ti tak tak tur chuan Dan tha tak kan nei a ngai a ni. Chutah chuan Mizoramah kan hriat theuh angin harsatna tam tak kan tawh a. Drugs, damdawia tha taka kan hman thinte pawh hman sualna avangin nun tikhawlohna te, suahsual rawngbawl nante kan hman thin a

ni. Chutiang do let tur chuan Dan kan mamawh em em a, kan sawi thin a. Vawiiina kan Bill hi kan House Leader zahawm tak, kan Chief Minister zahawm tak thahnemngaihna avanga lo piang chhuak liau liau a ni tihte pawh hi ka sawi duh a ni.

Tin hei, Bible kan nei a, ringtute kan ni a, kan Bible hi a famkim hlein ka hria a. Rom Bung 4:15 ah chuan ‘Dan awm lohna ah chuan bawhchhiatna pawh a awm hek lo’ a ti tlat a ni. Dan a awm loh kha chuan inhrem dawn pawhin bawhchhia nihna kha a awm thei lo a. Rom 3:20 ah ‘Dan avangin sual hriat famkimna a lo awm a ni si a,’ a ti a ni. Chuvangin, vawiin ah hian sual lova kan ngaih te sual a nihna dan, thil tha a kan ngaih thil tha lo a nihna dan a kha he House zahawm takah hian kan sawiho tur leh kan bill in a tum dik tak chu a ni tih kha Pu Deputy Speaker, thu hmahruai angin kan sawi duh a ni.

Tin, a 2-na ah chuan he dan hi Social Welfare department in a han put luh chu a va mak ve ti a member te pawh min han zawt he hu te pawh a awm theih a, an awm bawk a. A bill ah khan kan en in ka ring a, kan hre vek ang a. Keini a department hi chu a rehabilitation lam leh engemaw ah kha kan lang ve a. A tak taka han hmanga ti tur chu Police lam te, kan Excise lam te, kan Health department lam te pawh an nihna lai a awm a. Ama’rawhchu, Pu Deputy Speaker, Mizoram mai ni lo, India ram bung tam takah harsatna heng avang hian a awm a. Chumi avang chuan Ministry of Social Justice and Empowerment Minister Pi Kumari Shelja chuan kan Chief Minister hi lehkha te rawn thawnin 2013-ah khan India rama ruihlo in mipui leh kan sorkara harsatna a thlen dan te, mahni state ah te pawh lo bihchiang a, lo enchiang turin a rawn thawn a. Chutah chuan kan Chief Minister hmalakna in ni 27.5.2013-ah khan UNODC kan tih mai United Nation Office on Drugs and Crime te huaihawtin I&PR conference hall ah hian kan Chief Minister zahawm tak khuallianna hnuaiah MSACS kan tih te, NGO kan tih hrang hrang te nen he problem hi sawiho a ni ta a ni. Chumi sawiho na atan chuan resolution 3 a lo lang ta a. Kan rama tul leh mamawh nia hriat, chutah chuan comprehensive drug policy duang turin committee din an rawt a.

Tin, 2-na ah chuan High Power State Coordination Committee Chief Secretary kaihhraina hnuaiah din an ti leh a. Tin, high level monitoring, state level committee Chief Minister kaihhruai na hnuaiah din ni se tih kha he meeting ah hian rawt a ni ta a ni. Chumi bawhzui chuan ni 8.7.2013-ah sorkar pawhin notification a chhuah nghal ta a. Chutah chuan, bawhzui niin drugs chungchanga kan policy te pawh hi neih niin drafting committee kha ni 11.12.2014 ah khan din niin, chung chuan Mizoram Drugs Policy 2014 an rawn duang ta a ni. Chu chu ni 19.6.2015 ah High Power Committee Chief Secretary Chairman-na hnuaiah chuan ngun taka zirchian niin, tah chuan pawm a ni a. Ama’rawhchu, a hmingah Mizoram Drug Demand Reduction Policy tiha thlak a ni ta a ni. Chu chu Assembly hmasa ah khan Pu Deputy Speaker, he House zahawm takah hian chu policy chu kan rawn lay ta a ni. Chutah ni 7.12.2015 meeting ah Mizorama Drugs Control Bill hi kan neih a tul a. Hemi a hma la tur hian Drafting Committee din ni se tiin an rel leh ta a. Chutah chuan Pu Deputy Speaker, i chairman na hnuaiah kan mithiam tak tak te, Police lam te, Excise lam te, Health lam te, Social Welfare lam te fawmkhawm in, i ho in chu Dan chu kan ramin kan mamawhna siam turin a lo ruat ta che u a. Chu chu ni 29.6.2016 ah khan in report te leh in draft te Chief Minister in en leh in high level in a lo pawm ta a. Chu chu vawiin ah hian he House zahawm takah ka rawn chhawpchuak ta a. Sawiho a he House hian pass turin kan rawn move ta a ni.

Chuta kan sawi tel duh chu Pu Dy.Speaker, India ramah State hrang hrangin heng ruihhlo avanga harsatna kan tawh karah hian India rama state hmasa ber kan nihna pakhat a awm a. Chu chu State sorkar in ramchhungah State wise a survey, a nih phung tak eng ang nge, drugs hi Mizoram ah/kan State ah engzatin nge khawih, opium mi tam takin an ti thin, kan uar hle kan ti ringawt. Engzat chiahin nge opium chu ching a, engzat chiahin nge dendrite hnim tih ang chi te chipchiar zawka survey nei turin kan sorkar in nuai 20 lai mai a ruahman a. Chumi hmang chuan tunah hian Social Welfare department hian survey Mizoram ah a bei mek a. Chumi atan chuan mithiam bik international expert te pawh lo ni tawh mi ruaiin, chumi kaihhruaina hnuaiiah chuan waviin ah hian kalpui mek a ni a. Reilo te ah heng survey te pawh hi peih theih a nih a rinawm a. India ramah state in hetiang taka ngai pawimawh a, survey nei hmasa ber (state sorkar sum) chuan kan ni a. Punjab an hmasa ber a, ama'rawhchu, Punjab erawh chu agency in anmahni state pawisa ni lo a an tihsak a ni tih kha ka'n sawi tel duh a.

Pu Deputy Speaker, waviin ah hian kan ramah kan hria a, kan khawtlangah ruihhlo in kan thalaite a run a. Harsatna tam tak kan tawh a, tunhmaa damdawi tha tak kan tih thin te, hmanraw tha tak kan tih kan hman tangkai thin chu suahsualna bulah te kan lo hmang ta hial a. Chutiang chuan kan khawtlang kan buai a ni. NGO, YMA kan tih ang te, kohhran kan tih ang te in waviin ah hian nasa takin hma kan la tlang vek a. Theihtawp kan chhuah tlang a, hei hi a lawmawm hle a. Sorkar ang pawhin waviin ah hian hetiang kawnga hma la tu te chungah hian lawmthu he House kaltlang hian kan sawi duh a ni. Chumi kan do na kawngah chuan kan Dan waviina kan hman lai mek, kan hman ber te chu NDPS Act, 1985 kan tih (Narcotic, Drugs and Psychotropic Substance) te, Drugs and Cosmetics Act, 1940 and rules 1945 kan tih te ; tin, Assam Drug Control Act, 1950 te tlawhchhan leh heng hmang hian waviin ah kan kal mek a ni.

Chung ang kan hman a, chutiang anga kan kal lai chuan waviina kan harsatna tawh te, kan dinhmun te en hian heng Dan hi a relevant tawh lo em em a. Chung chu keinin va siam that vek theih a nih lohna lai a awm a. Tin, khatiang ang Dan lo awm tawh, Central Dan lo awm tawh thlak a kan va tih kha kan tih theih ngawt a ni lo a ni. Ama'rawhchu, chung famkim lo te chu tih famkim zawk a nih theih nan chutiang Dan te chu waviin ah hian Mizoram in a hranpa in The Mizoram Drug Control Substance Bill hi a buatsaih ta a ni. Entirnan, Pu Deputy Speaker, hemi NDPS Act area ah chuan ruihhlo neitu leh a kawltute hi a thliar hrang ta lo a ni. Chutihlai chuan NDPS Act a ruihhlo atana minimum punishment chu 10 years conviction a ni convict turin. A kawltu thliar hrang lova, a neitu thliar hrang lova, a neitu khan tuemaw khan tuemaw hnenah lo dah a, a kawltu a nih lai reng khan mi in han hrem dawn sela, convict dawn sela, a minimum kha kum10 a ni. A hremna hi a na em em a, chuvangin, conviction rate te pawh hi a tlem ni te pawhin lehlam ah ngaih a ni.

Tin, entirnan, ganja te pawh Mizoram ah chuan ruih nan kan hmang nasa a ni. Amarawhchu, NDPS Act a ganja a zu hrilhfiahnaah chuan ganja chu a par leh a rah a tel tur a ni. Mahse, Mizoram-a ganja kan hmuh leh kan ruihpui ber chu a hnah ringawt a ni si a ni. Chuvangin, NDPS Act a ganja tia zu man a na taka zu hrem tur khan kha ganja kha keini rama kan ganja hmuh nen hian a inmil thei lo a ni. Tin, hmanraw siam nana tha tak taka kan hman thin dendrite kan tih te, tin, eraz-ex kan tih ang, heng office a kan hman te pawh waviin ah chuan mi tam takin ruihhlo ah an chantir a, an hmang sual tawh a ni. Chung ang chu NDPS Act-a Dan hmangin khang ti tu leh khang kha va hremin

emaw kha thil kha va control dawn ila Dan tlawhchhan tur a awm tlat lo a ni. Nichina Bible chang kan sawi ang khan, Dan awm lohna ah chuan bawhchhiatna a awm thei tlat lo a ni. Chuvangin, heng ang zawng zawng hi tuna kan Bill The Mizoram Drug Controlled Substance Bill, 2016 ah chuan chapter 3 section 5-na ah khan state sorkar in a duh chuan controlled substance ah a puang thei ang tih a ni ta a ni. Controlled substance ah kan hman sual leh kan hman dik loh ang chi zawng zawng kha a puang thei ta a. Tin, chutih rual chuan naktuk, nakumah eng thil nge sual nan kan hman leh ang a sawi theih loh. Chung lo kal leh zel tur pawh chu he Dan hmang hian kan sorkarin a lo khuahkhirh thei dawn a ni a, chutiang chu a ni. Chuvang chuan Pu Deputy Speaker, he Dan in a tum ber ta chu, kan Dan hmanlai famkim lo te tih famkimna tur a ni. Tin, controlled substances kha sorkarin a duh hun hunah a puan theih tur a ni.

Tichuan, he kan Dan ah hian a authority leh officer te section 2 te, section 3, 4-ah khan a tlangpui a rawn sawi a, kan hre tlangpuiin ka ring a. Section 2,4-ah chuan chak zawka kha Dan kha kalpui a nih theihna turin Guwahati High Court rawnin district level ah te pawh Co-ordination Committee kha District and Session Judge Chairman-na hnuaiyah te a din a, a concern hrang hrang te nen chak zawka a hmalakna turin Committee te pawh din theih a ni a.

Tin, ruihhlo ngaite khatiang te ti nagwr ngawr lo khan anmahni dam khawchhuah leh enkawl zuina tur atan te sorkarin hma a lak theih dan tur te khangah khan a rawn lang vek a ni. Tin, chapter 3 ah phei chuan drugs kan dona leh kan hmalakna kawnga State sorkarin fund a neih dan tur te a rawn tarlang a, mimal leh pawl anga sum an rawn thawh ang chi ah te khan khami-ah khan a lut khawm ang a. Ruihhlo ngaite tana hman a ni ang a, ruihhlo hman sual that lohzia khang ang chi atana sum hman tur a kha “State Fund for Control and Drugs Abuse” atan khan awm tura tih pawh a ni.

Tin, prohibition offense leh penalty ah te pawh section 19 hi a pawimawh khawp a, he Dan hnuaiya thil tisualtute hi Police leh Excise te khan warrant tel lovin an man thei dawn a, non-bailable a ni thei tawh dawn a ni. Tin, Magistrate in he Dan hnuaiya tupawh officer a authorized kha chuan warrant of arrest te nei lovin mi in te dap in an man mai thei dawn a, chu chu hmalakna kawnga chak leh zual theihna tur a ni. Section 22-ah phei chuan Drugs Control Excise leh Police Department a thuneihna te pek chuan khatiang khan hma an la pawp pawp thei dawn a ni tih kha a lang a.

Tin, chapter 7-ah te khan sorkarin tul a tih angin he Dan tlawh chhan hian Rules a siam thei ang tih te a ni a. Tin, sorkarin ruihhlo ngaite enkawl na hmun leh a tul ang ang damdawi te pawh ruahmanin khatiang khan a kalpui thei ang tih te a ni a. Chuvangin vawiina Pu Deputy Speaker, kan Bill “The Mizoram Drug (Controlled Substances) Bill, 2016 “ in a tum ber chu khatiang lam hawi kha a ni. Section in emaw, chapter in emaw vawiiinah ka rawn sawi hran lova. Hei hi vawiina kan ramin kan mamawh em em leh tul tak a ni a, chuvangin kan member te pawhin kan sawi hova, he Bill kan pass a kan hman hi chuan kan ramah tun aia ziaawm zawkin kan kalpui thei ang tih hi ka ring a ni. Vawiina kan hnam, kan thalaite min run nasa ber chu damdawi hman

khawlohna hi niin a lang. Vawiin ah hian ram leh hnam humhalhna kan ti a, ramri te pawh kan in vei siak a, a tha e, ramri ah sawi tur kan ngah kan ti a ni pawhin a tha e. Engpawhnise, vawiin ah chuan Zofate min run a min tichhe mektu chu drug hman khawlohna hi a ni. Hemi hi vawiin ah kan zavai hian do tlang ila, hei hi ram leh hnam humhalhna leh hmangaihna tak tak a ni zawk hial a ni ti hialin he Bill hi he House ah hian karawn sawi duh a. Member ten min sawipui a min pass pui turin karawn pharh a ni. Ka lawm e.

DEPUTY SPEAKER : Awle, Minister-in fiah takin arawn move a, a copy kha kan dawng theuh tawh a, chuvang chuan an move nghal kha kan phalsak a. Lawmthu sawi liam liam a pass nghal mai chi emaw ni le, a tul zia te a sawi fiah bawksa, Tichuan sawi duh neite kan awm ang a, member ten thahnemngai takin sawi tum ila. Tichuan minute 10 kan in pe ang a, pelh loh hram tum ila. Awle, Pu Lalrinliana Sailo i lo sawm ang.

Pu LALRINLIANA SAILO : Pu Deputy Speaker, ka lawm e. Vawiina kan Bill sawiho tur hi a pawimawh khawpin ka hria a, a chung thu te, a technical te kan hriat thui loh avangin sawi tam ka tum lova. Bill pawimawh a ni a, nichinah kan Minister zahawm takin arawn move a, a pawimawh thu thiam takin a sawi a, chu ai mah chuan kan lo chhiar kan lo chhiar te leh tunhmaa term hmasa lama kan lo ngaihtuah te a takin arawn chang dawn niin ka hria a, ka lawm khawp a.

Kan hriat angin tunah hian ruihhlovin kan ram min run a, chungkaw hrang hrangin kan tuar mek a. Khawzawlah tlem lai khan ka han kal a, tlangval duhawm tak mai kha HIV Aids a vei tih min hrilh a, ‘engvang nge’ ka ti a, ‘drugs vang’ an ti a. ‘Drug hi khawi atanga lo kal nge?’ ka ti a. ‘Champhai district ami hi chu Burma atanga lo kal a ni,’ an ti a. Tichuan ‘kan fight ang’ ka ti a, Champhai-ah ka chho va, kan member zahawm tak Pu TT Zothansanga Inah hian DC te, Excise te, Police te, NGO te kan inhu khawm a, amah Pu TT Zothansanga pawh a awm a, ‘Champhai MLA zawngin nuaikhat theuh kan fund atanga thawhin bul i tan ang u,’ kan ti a. Chutiang taka kan beih lai chuan drugs tawlhah te kan inpuh ta zui a ni a. Pu Deputy Speaker, kan han rel ho reng reng leh ruihlo umnaah hian Dan kan neih mumal loh avangin harsatna kan tawktawh a. Chief Minister zahawm tak hova kan rel pawhin chutho chu a ni a, kan Dan neih sa hi chuan a dik tak chuan Health Department hi hemi chungchangah hi chuanin a neitu chanvo nei chauh a ni a, Pu Deputy Speaker i hre zawk anga tiang lama dan thiam i nih avangin. Tunah hian ka hriat sual loh chuan Mizoramah drugs substances reng reng ah a man hi a bikin kan chak lo zel a ni, kan dan neih that loh vang a ni a. Chutiang chuan ngaih ruatin lunglen a hril chang chang tih ang deuhvin Health Department kha a drugs siam chhuah leh a ka a lem thlenga thuneihna neitu drugs control kan nei a, kha erawh kha chuan 2013 kum tawp thleng kha chuan mi pahnih vel chu kan convict tawh a, a bakah chuan convict reng reng a awm lo a ni. Chu chu a chhan chu kan Dan neih that loh vang a ni a, hetianga Minister chak takin kan Chief Minister leh nangmahni te nena in lo rela hi a ropui ka ti a, a tul tak meuh meuhin ka hria a ni.

Chutilai chuan Pu Deputy Speaker, hemi drugs substance ah hian, kan hriat tlan, NDPS, 1985 Act hi keini hian kan lo siam ve hian, chung ang chuan in lo rel ka ring a, thui tak, helaia sub nos. te te kha kan lo hriat loh avangin, khalai nen khan a inzawn tha tho in ka ring a. Chutih rual chuan, Assam Drug Control Act hi kan sawi ve thin a, repeal tawh/repeal leh lo tih te kha a ni ngei mai a. Kan Narcotic department lam pawhin hei hi an tlawhchhan a, tlawhchhan tlak niin kan hre si lova, dik tak chuan. Tichuan, an thahnemngaihna, Excise, Police leh NGOs thahnemngaihna te, nasa takin hna thawk mahse, Court kan han thleng a, Court khan tihngaihna a hre lova, a sezawl-chhuah leh deuh tlat hian a lang a. Chuvangin, heng Dan hi kan hun hmasa lam pawh khan ka lo rawt ve tawh thin a, kan Chief Minister zahawm tak hnenah te, he Dan hi Assembly ah ti ve rawih mai ila tiin.

Ka han sawi tum tak chu, NDPS Act hi miin rawn zir chiang ta se, i veilam ami te pawh khan chu chu rawn ti se, mahse'ng keini hian kan workforce, kan hnathawktute inchhanna tur leh anmahni tana tlawhchhan tur kan lo siam ve phawt hi a ngai a ni ti a (ngaihtuahna fingo te mah ni se), lo seng ve thin ka nihna laiah khan, hei hi a lo chhuak ta hi lawmawm ka ti a. A ngaihna hre zawk leh tha zawkin thil an rawn ruahman a. A chhung thu thui tak ka han en a, lunglen thlak ka tih avangin ka rawn thlur lo ang a.

Kan Minister hian a move thiam a, a move tha a, engemaw sawi leh belh tur chu a awm ang. Amaherawhchu hei hi hna hmanhmawh a ni tlat a ni. Kan Police, kan Excise, NGO te leh thawktu hrang hrang hian tlawhchhan an neih a ngai a, chu chu kan siam a ngai a ni. NDPS Act in a rawn sawi lem loh, khang hrang hrangte pawh kha kan belh luh zel chuan, chu chu keimahni siam a kha a ni dawn a, chungte chuan a puih theih ka ring a. 'I thu in thiam i chang a, i thu vekin thiamloh i chang ang' tih angin, hei hi tanchhan min chhiar thlak khum leh thinna a nih avangin tuna 'The Mizoram Drug (Controlled Substances) Bill, 2016 a lo chhuak hi lawmawm ka ti a. A buatsaihtute zawng zawng an hah hle in ka ring a, kan Minister pawh ka fak a, a nihna anga pass pui turin ka support a. Ahmasa bera din ka chuh a, min pek avangin ka lawm e, Pu Deputy Speaker.

DEPUTY SPEAKER : A lawmawm e. Dr. K. Beichhua i lo sawm ang.

Dr. K. BEICHHUA : Pu Deputy Speaker, ka lawm e. Mizorama ruihhlo hman sualna hluar ta em em hi kan vei tlangin ka hria a. Kan thalai duhawm tak tak ten hun lovah mual min lian san a, chhungkaw tam takin kan tuar a, kan rum a ni. Chutihlaiin, kan thalai tam tak rehabilitate ngaite pawh an la awm mek bawk a. Chutiang a nih laiin, he Bill vawiina rawn lut hi tha ka ti a, ropui ka ti a. A puluttu kan Minister zahawm tak hnenah lawmthu ka sawi duh bawk a.

He Bill hi a tha a, chutilai chuan tihdik famkim te pawh hi a lo har a, chuvang chuan kan sawiho ang a, i vei/i ding tih pawh awm lem lovin, diklo lai anga kan hriatte kha chu he House-ah hian kan zavaia hman tur leh kan ram tan a nih avangin siamthat tul ngai angte kha chu siamtha mai ila, pawmpui tul lai pawmpui mai ila tih te rilru-ah ka lo nei a. Siamthat ngai leh ka hriatthiam loh lai tlem ka han sawi ve ang a, a changtu Minister pawhin ngun takin min lo chhinchhiah sak se, ka hriatthiam loh laite pawh min hrilhfiah se tih ka ngen a.

Chapter 1, Section 2, sub-clause 2-ah khan, ‘addict means a person who has dependence in any drug having abuse potential and consumes the said drug’ a ti a. Helaia, ‘who has dependence’ a tih hi ka hriat danah chuan a sap tawng hi a dik lo tlat. Chuvangin ‘dependent on’ tiin thlak ta ila, chu chu english dik zawk niin ka hria a. ‘Dependent on’ tih kha chuan a adjective a, ‘dependant’ kan tih chuan noun a hman tur ni ta se, ‘ent’ khan thlak ta ila tih rawtna ka siam a, pakhatna ah.

Pahnihna ah chuan, Chapter 2, Section 3, sub-section a awm thla zel a, 2(a) kha, ‘co-ordination of action by various officers, departments and other authorities’ a tih lai tak kha, ‘various officers’ han tih tawp kha a dik ber em tih rilru ah ka nei a. ‘Concern Officers’ ti tein emaw thlak ta ila a dik zawk lovang maw ka ti a. Ka ngaihnan hi a dik lo a nih chuan min lo hrilhfhiah mai turah ka ngai a.

Chapter 2 tho, Section 3, sub-section 6 kha, ‘with a view to adopt uniformity kha han chhiar thla zel ta ila, a tawpahn khan ‘... place of drawal of sample etc’ a ti a ni. ‘Etc’ khan Dan tha tak siam nan chuan a ti zahawmlo deuhin ka hria a, ‘etc’ kan tih khan thil dang tam tak a kaw thei a ni. Damdawi tam tak hi a nih dan tur aia ei tam chuan substance abuse theih thil te a nih deuh vek avangin he lai ‘etc.’ hi paih theih ni se tha in ka hria a.

Chumi bakah chuan Chapter 3, Section 4 (b), ‘State Fund for Control of Drug Abuse’ tih kha headline a ni ta a, ‘the sale proceeds of any drugs seized or property forfeited’ tih khan eng nge ni a kawh chiah tih kha, heng thil damdawi leh ruihtheih thil kan man ho te kha a nihna ang ang leh a man ngai ngai ang khan kan zuar leh dawn, a ngai ang ang khan em ni kan zawrh leh dawn tih te kha min hrilhfhiah theih chuan ka hre duh baw k a.

A tawpna berah chuan Chapter-4, Section-23 kha han chhiar thla leh ta ila. Para chung tawp lamah khan ‘which has reason to believe’ a tih ah khan ‘reason’ tih a nih ka ring a. Dan kan siam tawh chuan hetiang anga kan pawm tawp mai chuan spelling mistake leh patent error te pawh kha kan pass hnan palh ang tih te pawh kha ka’n hlauthawng deuh a, ‘which has reason to believe’ tih tur ni awm tak a ni a. Khang lai te te siamthat a tul lai te kha siam tha mai ila, he House zahawm tak hian. Tin, in hrilhfhiah a tul lai te kha in hrilhfhiah a pass mai tur chi ah ka ngai deuh a, khang karawn sawi ang te te chi te kha min lo chhinchhiah sak ta se, paih leh siam that tul lai kha chu siam tha nghal mai ila, tichuan pass mai kha tha ka ti mai e. Pu Deputy Speaker, ka lawm e.

DEPUTY SPEAKER : A lawmawm e. Dr. Ngurdingliana.

Dr. NGURDINGLIANA : Pu Deputy Speaker, ka lawm e. He Bill “The Mizoram Drug (Controlled Substances) Bill, 2016” kan Minister zahawm takin arawn putluh hi a hmaa sawi tawh ang khan kum nga kal ta vel khan nei tawh ila chu wawinahn kan bula dam tura kan duh tak tak te hi an dam ka ring a. Chuvangin he Bill tha tak mai kan Minister-in arawn putluh hi waw sawmhnih vel ka chhiar chhuak tawh a, keima experience atangarawn sawi ka tum a.

Kum sawm tal tawp JAC-ah te, Village Council Member ni a kan veng chhunga kan phak ang tawka rawng kan lo bawl tawhnaah veng chhung thenfai kawngah

kan hnungkhirh thin na zawng zawng veng kilkhawr, kan vengchhunga in kilkhawr ber bedroom-a kan kaltlang theihlohna zawng zawngte mitthla a han chhui let pawh hian he Dan hian minrawn um char char mai hi khatih hunlai khan lo nei ve ila chu aw tih ka rilruah arawn lut a. Sawisel tur hi a awm lova, a Dan siamtuten in lo zirchiang tih hi a lang chiang hle mai a. Chuvangin a section wise pawhin kal ngai ka ti lo, a inthuan tha em em a, a in ban let tha a, a tawpah delegation of powers kha Assembly, rorelna sang berah arawn pulut leh bawksi a. A kar laklawh inrelbawl danah State funding, engtingge funding kan hmuh ang? Tin, a officer te ngei pawh hrem theih a ni ringawt mai te, a controlled substance quality leh quantity te pawh in han thliar a. Khang zawng zawngah khan in ngaihtuahna in seng hle a ni, a lawmawm ka ti.

Kan Minister zahawm tak hi a department chanah sorkar atangin MLA-te tu tu emaw order a hmuh hi thil buaitlak deuh mai hi awlsam deuh mai hian arawn tichhuak thiam a. NDPS Act, a taka hman dawn chuan a khirh lutuk a ni, nichina kan ngaihthlak ang khan. Mahse Mizo society, Mizo context ang hian mawlmang deuh, khuap em em maia arawn phawrhchhuak thei hi a lawmawm ka ti a. Chuvangin han sawi vak ai chuan a taka khawtlang thenfaina kawnga hma latute zinga kan lo tel tawhna ah tunah chuan full power-in min thuam dawn a ni. Veng hrang hrangah, khaw hrang hrangah tlawmngai pawl a ni emaw, NGO a ni emaw, JAC, VDP-te an ni emaw heng Bill kan pass hnu hi chuan ngaihngam takin kan mi man te darkar hnih khatah anrawn chhuak, vengkawn ah kan la duty, a then chimawm deuh phei chuan minrawn nuhsawh. Khatiang ang te kha kut han thlak ngawt dawn ila dan kan bawhchhe bawksi a, tullo deuhah kan insehruh tul te pawh kha a awm tawh lo deuh ang a, khawtlang tan pawh hmalak te pawh a chakawm tawh ang. Tin, kum leh maiah drugs nge kan hmansual dawn? Dendrite te pawh kan hmansual duh a nih chuan hming mak pui pui pawh a lo thleng leh ang, khang thlenga an huamchho te kha inngaihtuahna in va seng hnem em, a va lawmawm em tih hi ka sawi duh a ni a.

A nodal officer chungchangah khan kan Minister zahawm takin arawn clarify atana ka duh chu Joint Secretary level kan tih ah khan a staff, a backup tu tur kha a kengtel turah ka lo ngai ve a. A chhan chu a department concern hian Health a khawih dawn a, Excise, Police, Paramilitary Force, NGO; chu lo pawh a lo piang teuh ang. Khami daily-a monitor tur khan engtingge a staff leh office set up hrim hrim kha helaiah awm lo mahse a awm dawn tho a, power hetah awm tho a, kha kha hriat a chakawm ve hrim hrim a, nakinah a wind up hun ah minrawn hrilh theih chuan. Kha kha sawi tur a tam mai a, ka sawi ang khan mahni inchan ila, he Bill vawiina kan pass tur ka ti tawh mai a, pass ngei ngei chi a ni a. Khang kan hunlaia mahni veng theuh, mahni khua theuha (kan member zahawm tak tak te pawh in ni ang,) in kalchhuah nikhuaa inhnungkhirh ang te, khingbai deuha khawtlang thenfaina kawngah hma in lakna kawnga khang diptu zawng zawng kha an awm ta lo ringawt mai hi, in chhiar thlak pawh khan in hre thei ang. Vawiina hetiang a felfai tak, Mizoram context mil bawksi anga kan Minister-in arawn pho chhuak hi lawmawm ka ti a. Heta Memorandum of Delegated Legislation-a thu arawn khaikhawm dan kha a thlamuanthlak ka ti em a, i phalna in Pu Speaker, kan chhiar hial teh ang, “ Moreover there will be a provision to simplify the procedures of conviction to raise the conviction rate and quality treatment of addicts. Hence, there is delegation of power involved in the proposed Bill” a ti a. Hei hian vawiina kan Bill kan Minister zahawm takin arawn ken, arawn putluh “The Mizoram

Drug (Controlled Substances) Bill, 2016” hi he House zahawm tak hian pawmpui ngei turin ka rawn dilpuiin ka rawn thlawp a ni e. Ka lawm e.

DEPUTY SPEAKER : Midang tunge? Aw Pu RL. Pianmawia

Pu R.L. PIANMAWIA : Pu Deputy Speaker, helai chapter 6-na Procedure , Section 21-na sub-section 2 tlar tawp lampanga a man thei tu tur atana peon leh helper or constable tih hi a him dam ber ang em kan kal zelna tur atan hian? Minister-in min han hrilhfiah deuh sela, a pawl lem dawn loh chuan ka pawm thei tho bawka a. A dang hi chu pass atan a tha ka ti vek mai e. Ka lawm e.

DEPUTY SPEAKER : A lawmawm e. Tunge han sawi leh ang? Pu Lalthanliana.

Pu LALTHANLIANA : Pu Deputy Speaker, ka lawm e. Kan Minister zahawm takin he Dan a rawn putluh hi a hmasa in ka pawmpui a, pass pui pawh ka duh a, a tha ka ti khawp mai a. Amaherawhchu kam hnih khat lek han sawi ka duh a.

Pakhatna ah chuan Chapter 5, Section 10, Clause (a) leh (b)-a small quantity tih leh commercial quantity tih te kha eng chin hi nge an nih ang aw tih kha ka ngaihtuah a. Hei hi tuna sawifel chi nge nakinah Rules in a rawn sawifel mai ang tih kha, rules in a sawifiah zo dawn lo a nih kha chuan sawifel nghal law law a va tha awm ve tih ka ngaihtuahnaah a awm deuh a.

Tin, tha ka tih deuh chu Section 9, Clause (b) hi a ni a. Drugs hman sualte tana detoxification te, rehabilitation te awm tur hian jail-ah khung mai lova chance tha tak mai mihring siam thatna hna thawhna tur atana helai clause rawn in hawng hi a tha ka ti em em a.

Tin, Section 14-a hremna kha a turu ang reng riau mai ka ti deuh a, amaherawhchu ka sawisel lem hlei lova sawisel phei chu. Twice tih vek kha a ni a.

Tin, hriatthiam ruai ruai hriatthiam chian loh ka nei a. Section 16 kha a pum khan min hrilhfiah chiang deuh se ka duh khawp mai a.

Tin, Chapter 6, Section 21, sub section 2-a tuna ka hmaa member zahawm tak sawi kha tlar hnuaihnuung tawp lampang ami ‘any officer subordinate to him but superior in rank to a peon, helper or a constable’ tih hi a extra mai mai lo maw, officer an ni lo tih chu a chiang tho si a ‘but superior in rank to a peon’ tih hi a tul kher em tih ka ngaihtuahnaah chuan a awm a, ‘any officer subordinate to him’ tih ah hian a tawka mai lo em ni? Tihdan te ka thiam ve lem lova, ka ngaihdan ka sawi ve a helaia section 25, sub-section (2)-ah pawh hian an sawi thla an sawi thla a, a dap thei tu mihring chungchangah khan, a tlar hnuhnuung ber sub-section (2) ah khan , Magistrate proceed to search a person as provided under Section 100 of the Code of Criminal Procedure, 1973, hei hi enge ni ang aw tih kha ka rilruah a awm deuh a, a tum leh a kalphung hrim hrim hi chu a tha ka ti a, hei hi kan thlawp a ni. Ka lawm e.

DEPUTY SPEAKER : A lawmawm e. Tunge han sawi ve leh ang le. Pu H.Zothangliana.

Pu H.ZOTHANGLIANA : Pu Deputy Speaker, ka lawm e. The Mizoram Drug (Controlled Substances) Bill, 2016, hetiang taka tha a kan Minister zahawm takin a rawn pulut hi a lawmawm ka ti em mai a, kan ding ve duh hrim hrim pakhat a ni.

Mizoram mamawh tak mai Dan tha em em mai, kan mamawh a ni tih kan hriata kan sawi ve fo thin, mahse engtiang taka siam tur nge ni ang aw ti a, a ngaihna tak keini ang chuan kan hriat loh kha kan Minister leh a thawhpui te, officer leh kan mithiamten thahnemngai taka buaipuiin, tha deuh maiin an rawn duang chhuak a, an rawn chhawpchhuak ta hi a lawmawm tak meuhin ka hria a ni. Chutih rual chuan member zahawm tak thenkhatten an sawi tawh ang deuh khan, tha em em ah pawh hian, han keu han keu takah chuan helai te hi chu heti deuh tur hi a ni lawm ni, han tih zeuh zeuh tur hi chu a awm ve tho in ka hria a. Chungte chu a te tham deuh viau na in a tha em a, thil lian pui pui sawi tur a awm lem loh avangin te tham deuh te te pawh kha Pu Deputy Speaker, han sawi mai ila. Thahnemngaihna vangah min lo ngaihsak dawn nia.

Pakhatnaah khan Section 2 (iii) “controlled substances” means any substance declared by the Government by notification, tih kha a awm a, kha kha, “controlled substances” means any substance declared as such, tih tur a ni lawm ni aw, ka ti a, ‘as such’ tih kha tel se a kim leh zual awm mang e, ka ti.

Tin, Section 3, sub-section (iii) The Government may, if it considers necessary or expedient so to do, tih a awm a, ‘so to do’ ti lo in, ‘to do so’ tih kha a ni zawk em aw, ka’n ti deuh a ni. Tin, kha mi sentence kal thla zel ah khan, tlar tawp ber dawttu ah, ‘taking measures with request to such of the matters’ tih a awm a, ‘with request’ ni lo in ‘with respect’ tih tur chhut sual palh mai a va ni awm em, ka ti a ni.

Tin, chapter-IV ah khan ah section VII, clause (a) ah khan, ‘possess, sale’ khami ‘sale’ a kha S-a-l-e a ni a, s-e-l-l , ‘sell’zawk kha niin a lang. Chubakah chuan chapter V, Section 9 ah thil te tak te bawk, clause (c) ah khan, a line parukna ah khan, ‘both, and the vehicle as used’ ‘as used’ tih a awm a, ‘and the vehicle so used’ tih ni awm tak a ni, ‘as used’ ni lo in.

Tin, khami chungah khan ka’n sawi hmaih tep a, a sub clause (b)-ah zawk khan line 4 na ah – ‘chemical form, such person shall undergo with’ tih kha a awm a, ‘such person shall undergo with compulsory detoxification,’ tih a ni a, ‘with’ kha chuangtlai palh mai mai a ni em aw, ka ti. ‘Shall undergo compulsory detoxification’ ni mai awm tak a ni.

Tin, khati lo lam deuh section 15-ah khan – Punishment for offence for which punishment is not provided, tih a awm kha a ropui ka ti a, a tha mang e aw, ka ti. Danah hian ziah famkim vek hi a har khawp mai a, a thla veng, huam zau takin provision an rawn dah hram a, hrem ngai hrem dan tur ziaak faka awm loh deuh pawhin hrem tur awm chi kha chu hrem tho tho tur a ni tihna kha ni deuhin a lang a, a tha mang e. A duhthawh thlak viau a, a tha bawk a ni ka ti a.

Tin, Section 16, Pu Deputy Speaker, nang Dan thiam mi i ni baw k a, a awmzia kha chianguang deuh hlekin min hrilhfiah thei hrim hrim la a tha mang e aw, ka ti. Nichinah khan member zahawm tak pakhat khan a rawn sawi tawh a, keipawhin a hmingin Dan siamtu pawlah te kan awm ve a, khalai kha a awmzia hriatchian deuh ka chak khawp mai section XVI kha.

Tichuan section 21(2)-ah khan tlar ruk na ah baw k, ‘ by any person and taken on writing’ tih a awm a, kha kha zia k sual deuh a ni em aw ka ti, ‘and taken down in writing’ tih ni awm a ni a. Chubakah chuan section xxii (d) proviso ah khan, a line tawp berah khan, sun set and sun rise tih word a awm a, kha kha a tum taka chu, sun set and sun rise ni lo in a hmaa a hman ang tho khan, sun rise and sun set tih kha a tum zawk niin a lang. A chhan chu a hmaa sub-section (i) ah khan, between sun rise and sun set tih kha a hmang tawh a, sun set and sun rise tih leh sun rise and sun set tih kha chu a kawh a letling hlauh mai a, khalai kha siamthat tur.....

(DEPUTY SPEAKER : Eng section maw i tih tun ami tak kha?)

Pu H.ZOTHANGLIANA : Section 22 sub-section I, clause (d) proviso tlar hnung ber kha, between sun set and sun rise a rawn ti ta hlauh a khatah khan, kha kha sun set and sun rise ni lo in, sun rise and sun set tih leh tho tur ni ngeiin a lang. A kawh tum kha a letling, a inang lo hlauh a ni.

Tin Section 27, sub-section I-ah khan, ‘ The Government may’ tih kan hmu a, tichuan a kal phe i zel a, sentence kar zeh kan ti mai ang chu, a kal phe i zel a, line 5 na ah khan gazette tih kan hmu a, gazette tih zawh coma zawhah khan, shall, tih kha a awm leh a, ‘ shall specify’ tih a ni leh a, kha kha a tlar hmasa bera ‘may’ a awm tawh avangin, ‘shall’ emaw ‘may’ emaw kha a engemaw zawk zawk kha chu chuangtlai ni ngeiin a lang. Kher te neuh neuh mang e aw min ti maithei a, mahse a tha em a, sawi tur lian pui pui awm loh vang a ni.

Section 32-ah khan sub- section (i) kan hmu a clause (a), (b), (c) a awm thla a, clause (c) kan chhiar phe i khan line 2-naah chuan “arrest any person, shall be punishable with” tiin a zawm phe i ta a, khalai taka kha zia k dan dang pangai ah kha chuan “shall be punishable with” tih phe i kha a clause (a), (b) leh (c) ten an intawm vek a nih avangin clause (c)-ah khan bet lovin separate para a awm tur ni ngeiin a lang baw k a ni, para hrana awm vele h tur niawm tak a ni.

Tin, thil pakhat ka hriat thiam loh deuh hlek a awm a, Pu Deputy Speaker, Section 33-ah khan officer sorkar lam mi chungchang a inziak thla a, lo tisu al palh a nih chuan hrem ve theih a nih thu kan hmu a. Sub-section (i) of section 33 tlar tawp lamah khan a punish dan tura kha “6 months or with fine or with both” tih kha a awm a, “with fine” tih lai taka kha sawifiah zui a ni ta mia h lo a, hmun dang zawng zawngah kha chuan a fine-a kha cheng engzat thleng nge ni thei ang tih kha a awm vek a, helai bik a awm loh chhan hi enge ni ang aw ka ti a. Sorkar lam mi te hremna tur a nih avangin cheng 1 lek pawh chawi tir kan duh maithei a, tihna avang em ni ang aw ka ti a. Chutiang a nih chuan a fair bik chia h dawn em ni? Midang zawng zawng hrem theihna pawisa bituk a awm vek si laia, helaia a pawisa zat specify a ni ve lo hi, a fel lo deuh em tih kha ka rilruah zawhna lianpuin a awm a ni.

A dang leh ah chuan Pu Deputy Speaker, Section 34 pumpui kha ngun takin , khawngaih takin Pu Deputy Speaker, saptawng thiam takin han chhiar la, a saptawng kha a khingbai a, sentence kimchang a ni lo tih min pawmpui ka ring “Whenever any offence punishable under this Act” tih atanga a piah lam zawng zawng kha chu thu tlazep ang a ni a, a zawmtu chu a line hnung ber “shall be liable to confiscation tih kha ani “Whenever any offence punishable under this Act shall be liable to confiscation” tih a ni a, sentence kalhmang kha a kim lo a ni, engemaw hmaih a awm niin a lang a. Chu chu kimchang deuh taka ka hriatthiam ve dan a kan ziah that dan chu hetiang hi a ni. “Whenever any offence punishable under this Act is committed in respect of controlled substances, articles, documents, etc. or animal or conveyance used in carrying controlled substances. The substances emaw, such substances, articles, documents etc. or animal or conveyance so used shall be liable to confiscation” tih duah a ngai a ni, a kim tur chuan. Anih loh chuan a sei lutuk, a tul lo kan ti a nih chuan, heti hian tawi deuhin kim zawk, dik ve thovin a dah theih em aw ka ti a “Any controlled substances, articles, documents, etc., or animal or conveyance involved in any offence punishable under this Act shall be liable to confiscation” tih khan sentence tawi fel deuh zawkin a dah mai theih bawkin ka hria. Tuna inziak ang ngau ngau kha chu a kim lo a, a dik lo deuh em ni aw ka han ti ve a ni.

Tin, Chapter 7-ah khan Pu Dy. Speaker, Social Welfare Department-in he Bill a putlul chhan, pulut tur a nihna chhan rawn lan fiahna a awmin ka hria a “Power of Government to establish center for identification” tiin a dah a. Tah khan sorkarin addict te leh enkawl ngai, mi hrang hrangte enkawl na tur centre a din thei ang tih te kan hmu a. Chubakah chuan hetiang lam centre hrang hrang te pawh an phu dan a zirin accreditation-te pawh a pe ang a, chu mai bakah chuan heng centre hrang hranga thawktute, qualification-te leh training chungchangte pawh a enpui ang a, an power leh responsibility te pawh a set fel ang tih zawng zawng kha kan hmu a, a ngaihthat thlak huai huain ka hria. Mizoramah hian Pathian rawngbawl naa ngaite leh kawng hrang hranga mi thahnemngaiten mahni insengso in ruihhlo ngaite leh enkawl ngai midangte an enkawl thin a, centre tam tak tha takah chhenfak awm tak an awm laiin, centre thenkhat te erawh hi chu an ti tha lua lova, an inenkawl dan pawh hian mihring a siamtha lem lo mai ni lovin a ti khawlo zawk em aw tih te pawh hi ngaihtuah theih tak niin ka hria a. Chutih laia hetiang Dan tha tak mai a lo awm ta te hi a lawmawm mang e aw tih kha kan thu tawp lam atan kan belh bawka ni. Pu Deputy Speaker, ka lawm e.

DEPUTY SPEAKER : A lawmawm khawp mai. Pu T. Sangkunga.

Pu T. SANGKUNGA : Pu Deputy Speaker, ka lawm e. Ka hma ami ten an sawi tawh ang khan Mizoram-in a mamawh em em mai, Mizoram Drug (Controlled Substances) Bill, 2016 changtlung tak leh tha tak mai kan Minister zahawm takin a rawn pulut a, a rawn sawi kha a ngaihnawm tel bawk nen han sawipui zui ngai lo khawpa tha a ni in ka hria. Amaherawhchu a Bill hi sawi hi a chakawm ve hrim hrim a. Dan tha han hmuh thar hi han sawi ve kan duh a. Kan hriat angin, tunlai khawvelah ruihhlo leh ruihtheih thil hian hmuntinah thalaite a ti buai a. India rama State changkang leh hausa bera kan ngaih thin Punjab-te phei khu chu tuna an thalaite harsatna leh ruihtheih thilin a chim nasat zia khu a rapin a rapthlak a.

Mizoram pawh hi kan bang hauh lova, Aizawl-ah hian kan thisen zawmpui hetiang vei nei lo an awm a nih chuan chhungkhat an nei tlem hle a ni ang. Chutiang khawp chuan he thil hian min ti buai a, kan ramah chhiatna a thlen a. Kei te hi ka bang lo nasa a ni. Chuvangin, he Bill hi kan ramin a mamawh nasa a ni a. Kan hriat theuh angin ND & PS Act te, Drug and Cosmetic Act tih te, Assam Drug Control Act & Rules kan han adopt tak te hi a hlui tawh a. Kan ruihtheih thil an sawi te hi a kim lo nasa tawh a. YMA ten thahnemngai takin heng hi an check thin a, keipawh chutiang ti zingah chuan hei kan thian tha, kan member zahawm tak Pu Lalruatkima te, Pu Zawma te nen kan tel nasa thin a. Mahse han man ila, an ken lai kan man ngei pawh an tang dawn emaw ti ila a tukah bazarah te kan intawk leh nawlh nawlh a, a mantu nih pawh kha a zahthlak kan ti thin a ni. A chhan chu Dan mumal a awm lova, prosecution ho hi an chak thei lo a ni. A chhan chu nichina kan sawi, kan Rules hman lai leh kan Act hman laiah Diazepam, Heroin te, Ganja te, Opium etc. tihte an tel a. Chungchu charge-na a awlsam em em lain a dang tuna kan ram tibuai ber bertu zawk, damdawi ho tak taka lang Dendrite tih te, correcting fluid tih te, castapha tih te, hetiang hmana hman chia ngaih loh hi an huap tel lova. Hengte hian kan thalaite an in tichhe chho zel han en hian hetiang Dan kan Minister zahawm tak leh a thawhpuiten an han ngaihtuah chhuak hi a ropui ka ti a. Chuvangin Mizoram tan chuan thatpui ngei tur, YMA te pawhin an zu man kha, Excise leh Police tan te pawh zu charge-na awm sa, Dan bawhchhia an nihna tur awm sa, hetiang kan House-a rawn chhawpchuah a ni hi a ropuiin lawmawm ka ti a.

He Dan ah hian danglam bikna (uniqueness) pathum (3) a awm a. Pakhatah chuan Chapter 2, Section 3, sub-section (v)-ah hian State sorkarin tul a tih chuan notification chhuahin damdawi tha lo lo chhuak tun ami engemaw a huap bak lo la awm zel tur te pawh a'n huap a. Hetiang hi Dan (Act) dangah ka hmuh ngai reng reng loh a ni a. Hei hi a danglam khawpin ka hria a. Lo awm zel turte pawh huap khan kan pass ringawt mai dawn a. Kha kha a danglam ka ti khawp mai a, ropui ka ti a.

Tin, nichina an sawi tawh ang khan hetiang lam titu, Danin a sawi ni lem lo, Dana awmsa ni lo pawh, khang thil tha lo nia hriat zuartute han convict-na tur Chapter 4 Section 15-a a'n awm ringawt mai te hi chu a mak ka ti a. He Danah hian Dan bawhchhetu, Dana hrem tura tih lem loh pawh kha roreltuten an hrem thei ringawt mai a ni. ₹ 2000/- leh thla 6 lungin tan a la ti leh nghal a. Hrem tur tih zinga tel reng reng lo, Dana thil tha lo, 'ruihtheih thil a ni,' roreltuin a tih chuan ₹ 2000/- chawi leh thla 6 lungin tan emaw, or 'both' a la ti a, kha kha Danin a zu huap lohte pawh hrem theihna dan kha a danglam hi ka ti em em mai a. Atheni khuaah pathian a tam khawp a, an la duh tawk lo a, an hriat loh pathian tan pawh an la ti nen khan a inangin ka hria a, lo la awm tur atan pawh kan han siam duah mai a.

Chung zingah chuan a danglam 3-na ah chuan he Dan, tuna kan Bill, Act lo ni mai turin a zu huap miah loh pawh kha sorkarin a tul a tih chuan kha dan kha Assembly-a pass ngai tawh lovin notification siamin Rule a rawn siam thei mai dawn a ni te a'n ti lehngal a. Hetiang pathum hi a danglam zualin ka hria a. Dan ka chhiar tawh reng rengah ka la hmuh ngai miah loh, mahse tangkai em em tur si, eng damdawi emaw sorkarin a rawn tihchhuah emaw, company-in a siam chhuah pawh ni se, ruihtheih thila heta a lo hman kha chuan notification pakhat control substance a ni e zu tih theih mai tura rawn chhawp chhuah te hi eng Dan bu ah mah ka hmuh ngai loh a ni a, remhria ka ti a. Chuvangin heng rawn sawi te hi a chakawm ve hrim hrimin ka hria a.

Tin, YMA ten kan harsat em em thin Court-a va kala lo lang thin chu small quantity tih hi engzah nge tih hi hriat a har thin a ni. Tunah chuan hei hi Chapter 2, Section 3, Sub Section (v)-ah hian khami small quantity zat siam theihna kha kan sorkar hian a nei dawn a ni. An va man a, tlemte a ni tih kha chuan, ‘tlemte’ hi a inang lo em em mai a, a thenin kum khat te hi rei kan tih laiin pension dawn chuan kum khat hi a rei tawh lo nasa mai thin a. Mahse, kan hla sak tui zawng takah chuan ‘ni li a liam ta, a rei lua e, Lalpa’ kan ti a, ni li te kha a rei leh em em mai a. Chuvangin small quantity hi Court-a kan kal apianga hrilhfiah har zel a ni a. Chuvangin small quantity hrilhfiahna tur, tuna kan Bill en meka rawn chhawpchuah a ni hi lawmawm khawpin ka hria a.

Tin, damdawi tha lo hi engnge ni zu hriat a har khawp a, hei pawh hi kan Dan hmanlaiah hi chuan nichina Ganja pawh a zu hrilhfiahna ah chuan a har kan tih kha, Dan dinglai kan hman hi chuan kha kha a hrilhfiah vek a ni. Tun ami erawh hi chuan Chapter 2, Section 3, sub-section (v)-ah hian damdawi tha lo chi reng reng lo chhuak thar leh pawh ni sela, ‘hei hi chu damdawi tha lo a ni e,’ tia notification kha chhuah leh mai tur a ni a. A zo tha hi ka ti em em mai a, hetiang siam nachang kan han hria hi kan Minister leh a thawhpuite hi fakawm ka ti a.

Tin, Chapter 3, Section 5, sub-section (1)-a fund source sorkarin a siam thei tur hi lawmawm ka ti. Hetiang hi kan Dan awm tawh ka hmuhah chuan ka hre tlem baw a. Fund source siam theihna hetiang thil tha lo, ruihtheih thil lam sawina ah hian ka hmu ngai lova. Tin, a fund source te pawh hi Chapter 3, Section 5, leh sub-section 2-ah hian a source han sawi leh ta ila, Section 5 ami kha khata an man sa han hralhte pawh kha kha fund source-ah khan a awm thei dawn a. Hei hi danglam ka ti khawp mai a. Private-in an rawn thawh daih YMA ah te pawh, kohhran te pawhin an rawn thawh thin a. Kha kha heng centre atan hian fund source a ni nghal thei zel dawn a. Society te pawhin an la rawn thawh duh ang a. Sorkar pawisa ni kher lo, fund source-a a’n awm tur hi he Dan hi danglam ka ti a, tha ka ti khawp mai a.

Tin, khang fund hmanna tur Chapter 3 Section 5 Sub section (2) a a zu sawi hi tha ka ti em em baw a. Drug do nan a ti tawp mai a ni. A dawt leha chuan drug addict te enkawl nan tih te, prevention atan tih te, ka hmuh ngai loh lehzuawng, heng ho chi, drug ngai te, a tihbuai te enkawl tura training nan han tih te, training nana confiscate sale proceed han hman theihna te kha a danglam a, kan Dan hi a tha dawn hlein ka hria a, kan Bill hi tha ka ti a. Tin, mi compound-ah hian kan man fo mai a. A check tute harsatna tawh chu ‘ka ta a ni lo, min an rawn dah a ni,’ an han ti a, a man tuten “i ta a ni” an ti a, a buai em em a. Chu chu helai hian a rawn take care tha em em a. Chapter 4 Section 11 ah hian, ‘in neitu/luah tu in a in emaw , a room emaw, a in chhehvel emaw a a dah an zu man kha mawh an phur dawn a ni. Hetianga ziaq chiang hi kan neih loh avangin hei hi ropui ka ti a. ‘Ka ta a ni lo,’ an ti a, rangkachak chu ni se ‘ka ta a ni’ an tih duh hmel a, drug a nih chuan ‘ka ta a ni lo’ an rawn ti zel baw si a. ‘I ta a ni’ han ti ila, invuak fe hi a ngai mai a, invuak an phal tawh baw si lova. Hetiang Dan chiang tak mai, in neitu a nih loh pawha a luah tu compound-a man te pawh kha a take care vek mai a. Hei hi a fakawm hlein ka hria a.

Tin, Chapter 4 Section 9 Sub section (c) ami hi motor emaw, animal te pawhin kha damdawi kha rawn phur se, tunah pheih chuan mihring pawhin an ei a, an ekchuah leh te an chang a, ran te khan han ei se emaw, a rawn phurh te pawh kha a

huap thei vek dawn a, animal te a rawn ti vek mai te hi a ropui ka ti a. Sakawr te pawh kha a hmingin a ziakin ka hria a. Khatianga a rawn phurtu tih pawh hi debatable deuh mai a ni a. Tunah chuan chiang takin conveyance chi hrang hrang motor te, eng pawh kha he Chapter 4 Section 9 Sub Section (c) hian a rawn take care tha em em mai a. Tin, a hremna pawh hi a danglam khawp mai a, hei hi tha ka tia. A phurtu hi a ni, tuna kan mangan chu. Zokhawthar lam motor hi helamah hian a lun a, thuhrukna te an rawn siam tha nasa si a. A neitu hriat loh, ka ta ti duh awm hek lo, an chhuak leh mai thin si a. Tunah chuan hei kum 3 thleng tan tir theihna a ni riap mai a, a danga tawi te te an tan tir lai hian. Tin, tan theih bakah pawisa chawi tur pawh hi a tam a, a pahniha hman theih a ni leh nghal bawk a. A phurhna hetiangna tha deuh maia hrem dan tur na tak mai an awm talh mai hi mi motor sumo leh taxi a rawn phurh te pawh hi man a chakawm tawh deuhin ka hria a. Tin, a Dan bu ngei maia Rehabilitation Centre te, drug vei enkawlna tur, treatment lakna tur te chapter 7 section 42 sub-section 1-a chiang tak maia Dan bu-a an awm thlap leh Rule in a rawn take care leh zual ang a. Nichina kan member te rawn sawi, sumdawn nan nge an tih, centre pakhatat central team in an rawn en chuan damlo an lo mu a, lehlam an va en dawn kha khami te bawk kha an lo mu sawn leh a tih ang kha a awm tawh dawn lo va. Dan fel takin he section 42 sub-section 1 hnuaiha hian tha takin a rawn zui..... (power interruption) tur thil a nih avangin heng hi rawn ti rang se kan mithiamte bawk hian, law background neiin. Hei hi fimkhur a ngaihna chu kan hriat theuh angin mi vuak pawh awih a ni tawh bawk si lo va, a Dan te pawh hi ziaakah chuan fimkhur a ngai em em a ni. Tuna ka ding hi ka bul ami in mi kaphlum tawp se, mi kaphlum tih an hre reng a mahse chance of defence, a in explain na pe lo va Dan kan siam chuan chu Dan chu a chak thei lovang. Chuvangin Court hmaah ding tur a siam a ngai. Heng kan Dan (Rules) siam turah hian sangha te ai chuan fimkhur ngai tak a nih ka ring, mihring chungchang kan sawi dawn avangin.

Tin, drug deal tu, drug zuartu, mi hausa tawn taw fel tak tak te kha hei hian a khawih dawn a. Tunah hian a ram roreltu President pawh hlau reng reng lo hausa tawn taw, Punjab-a a khawih tute an han sawi pheikha chuan lung hi a chhe thin, a khawih tu an hraw lutuk. Hausak hi kan lo duh khawp mai a, chungte khawih thei tur. Hmana mi pakhat ka in a lo kal chuan, 'No.4 ka phurh dan chu sawhthing hi ka phur vak mai a, a karah khan No.4 hi Delhi pa hausa hian a dah thin a. Kolkata-a min lo hmuaktute chu arsi kai thut mai, Police uniform ang ha vek hi an ni a, check hi ka tawng ngai lo reng reng,' a ti mai a. Khangho kha kan hmachhawn tur an ni a.

Tin, mi hausa fa addict, 'ka fa a nih kha,' rawn ti ngat thei tur te pawh kha kan awm thei dawn a. A Dan (Rules)-a ziaakah hi chuan fimkhur taka kan siam te pawh a ngai dawnin ka hria a. Engpawhnise, hei aia Dan tha hi khawvelah hetiang lam ziaakna kei pheikha chuan ka la hmu lo hrim hrim a. Hetiang an rawn duang chhuak hi pass pui tlak an ni a. A Dan siamtu Minister leh a hote hi fak an phu in ka hria a. Chuvangin, he kan Bill tha tak mai hi pass turin ka rawn support em em a ni e, ka lawm e.

DEPUTY SPEAKER : Kan lo hmet theihngihl a ni maw, hun a hmang rei hle mai. Tawi te sawi duh tan minute 5 vel a la awm a, tawi te a sawi thiam tan chuan. Aw, Pu P.C.Zoram Sangliana.

Pu P.C.ZORAM SANGLIANA : Pu Deputy Speaker, kan Minister zahawm takin "The Mizoram Drug (Controlled Substances) Bill, 2016" a putluh ngaihtuah theitute

zinga kan awm ve te, kan pass ngei dawnin ka hria a. Chuta pawr taka 'remti' kan ti tur te hi hun kal tawh te kan chhut let thin a, vawiin ni hi a hlimawm ka ti em em a ni.

Ka hmaah khan kan mithiam tak tak ten saptawng kim lo lai te, a bai lai te, chuti chuan thlak zawk ni se tiin mithiam ten an rawn sawi tawh a. Chumi bakah pawh a tul dan leh tawn hriat hrang hrang atang ten an lo ti thin a. A hminga zirlai hruaitu kan nih a zu kan han do vak mai a, Dan tlawhchhan nei miah lo va MZP Aims & Objects No.6 na – Mizote dikna leh zahawmna humhalh tih behchhan chauh mai a, a mual muala kan han tuam thin hun lai te. A Joint YMA ang te leh YMA ang te-a a sakna bupui zu a ni emaw, drug a ni emaw, a awmna hmunpui kan han dap khawm thin, kan han ti thin te. Tin, chung a hnathawktu Mizo thalaite chhanchhuah duh tute, nu leh pa mangang au aw te lo ngaitla thin leh lo hre thin te tan chuan he Bill hi a nghahhlehawm a ni.

1993 kum tawp lamah khan Committee on National Youth Affairs tih niin ka hre ta e. Tahchuan Executive Member nih ve na in ka tel a. Mizorama kan thalai ten ngawl an vei chungchang ka sawi a, member zahawm tak tak ten min haw haw khum deuh thaw in min nuihzat a. Chuta member zahawm tak pakhat pheii chuan 'Mizoram Minister zahawm tak khan thu a sawi soal nge a sawi ka hresual,' a rawn ti a. Chuta ka sawi ka sawisual emaw a tih chu Paracetamol ngawl vei te Northeast-ah chuan kan nei a. Mizorama private te leh sorkar leh Kohhran ten an enkawlah te pawh, chung ngawlvei te chu a tam ber an ni a ni tih ka sawi kha, ka sawisual nge ni a a hresual tih kha zawhna Chairman address in a rawn zawt hial a ni. Mahse ka sawisual lo, a hnu kum 10 hnu chumi tuma tel ve te centre pakhat Director hmun ka tlawh leh ah chuan, chung an centre a an inmate 50% chu proxyvon, paracetamol, khang ang addict kha an lo ni ve der tawh mai a ni.

A lehlamah chuan kan thalai te hi an advance em em mai a. Miin an nuihzat medical science-ah chutiang ngawl a vei theih loh a ni an tih te hial pawh lo vei tawh an suffer te, an tuar lai te, mahni inchhungah ngei pawh bar siam a, nu leh pa ten bar hnuaiia thlenga an rawlh luh a chaw an pek thin te mit ngeia lo hmu tawh tan pheii chuan he Dan leh chhunga chung thlenna te, hrem theihna tur te, man theihna tur te, a bik takin Force leh sorkar hnathawk chu thudang ni ta sela. Kan ram hmangaihtu rual ti mai ang kan pasaltha, kan thalai rual ten vawiina an kut tha phuara awm thin Mizo hnam tan, thalaite him nan ti mai ang, chhanchhuahna tur atana thawk apiang hi heng Dan awm hma hi chuan case nei kan siam a ni ringawt mai a ni. Witness te an lo kal tha duh lo alawm, chuvangin an chhuak leh alawm tih kha Court lam ho thiam thu sawina a ni a. Khawilai thenawm tlangval emaw, khawilai tlangval hriat ngai hleih loh drugs zuar leh ruih theih thil dang ti emaw avanga mahni hna kalsan a court a va kal chhen, a TA/DA lah chu kum 3 hnu ah te an hmu chauh zel bawk a tlem te tham pawh. Chutiang karah chuan mi an beidawng tan ta emaw tih hial lain kan Minister zahawm takin he Bill tha em em mai, vawiina a rawn putlul a hi a tha in a nghahhlehawm ka ti em mai a, ka support hle a ni. Sawi tur tam tak awm mahsela ka support hle a, pass ngei hi ka duh a ni tih hi kan sawi chhuak a ni e, ka lawm e.

DEPUTY SPEAKER : A lawmawm e. Kan hun a tawp a, kan chawh rih ang a, dar 2:00-ah kan thukhawm leh dawn nia.

2:00 P.M.

DEPUTY SPEAKER : Kan Bill sawiho chawhma lamin member 8 in kan sawi tawh a, tunge han sawi ve leh duh? Awle, Pu Lalrobiaka.

Pu LALROBIAKA : Pu Deputy Speaker, ka lawm e. \ Vawiin ah Bill tha tak kan sawiho hi din loh phal chi ah ka ngai lova. Vawiin ah hian enge kan mamawh ber ti ila chu he kan Bill hi kan sawi tel awm tak niah ka'n ngai a. A chhan chu Mizoram hi kan hriat tawh angin ruihhlo in min kaltlang nasa a. Chung avangte chuan tunah hian harsatna tam tak kan tawk mek a ni. Chumi karah chuan kan Minister zahawm takin Bill tha tak mai a'n rawn pulut a, han din loh chu ni ngangin ka'n hre lova. Chuvang chuan ka rawn ding ve a ni a, thui tak ka sawi lo ang a. A tlangpuithuin a penalty te leh thil chi hrang hrang hi a fun kim hlein ka hria a. Tin, chapter 5-a punishment han tih te, illegal control of substances han tih te a thliar fel em em mai te hi engtinngge hetiang taka an thliar fel theih aw tih te hi ngaihtuahna a thui hle a ni. Vawiin ah hian keini helaia Legislator te lawmna ai mahin kan Dan kengkawhtute leh Court-a thu te keini lawm rual hian an lawm ang tih ka ring a ni.

Chumai ni lovin ram pum ang pawhin he Dan hi enforce a nih hunah chuan nasa zawkin kan rama ruihtheih thil lo lut te, tin, a ti te thleng pawhin nasa takin kan tihnam thla dawn a ni tih hi a chiang hlein ka hria a ni.

Tichuan hei han sawi ta mai ila, amah Pu K.L. Liana te pawh han sawi ila, a awm lo chuang lo ang chu maw, mi tamtakin YMA lam te leh pawl hrang hrangin an chhuahchhal changte ka lo hre ve thin a, ka thenawmpa a nih avangin. Ani sawi ber chu, 'Dan tlawhchhan tur a awm loh chuan keini Court-ah chuan chuti maia lo tang thei kan nih loh avangin Dan siamtute in nih angin helai hi rawn hre ve deuh teh u,' a ti ve thin a. Chulaite pawh chu vawiin ah hian ka'n hre ve duh hrim hrim a. Anni tan pawh hetiang ralthuam kan ti dawn nge, thuum tha tak kan han thuum dawnah chuan nasa zawkin kan ram tan an thahnemngaihna te, an thiamna te, kan Court lamte pawhin an hmang ve thei tawh dawn a ni tih hi a chiang reng mai a. Keini kan lawm ang bawh hian an lawm ve hle ka ring a ni.

Mizote hi lehlamah chuan kan fel em em rualin, kan hriatna a zauh em em rualin thil issue leh engemaw a lo thlen hlek chuan, hre ziktluak si lo, mahse hre tak si tamna hmun/ram kan ni a, chu chuan min hruai soal fo thin a ni. Chuvang chuan he kan dan "The Mizoram Drug (Controlled Substances) Bill, 2016" hi a changtlung ka ti a.

Tin, a neuh neuh, a wording leh engemaw a composition kha chu eng pawh lo ni sela, a thu ah pawh hian han correct tur pawh a awmin ka hre lova. Tin, sum a thawhchhuah tur te leh confiscate tur chungchangte han en pawh hian a mah leh a mah pawh a intung nung thei viau dawn a ni tih hi a chiang reng mai a, chuvang chuan a thain a fun kim ka ti a. Tin, kha kan Minister-in thiam tak main a rawn move a. Ani hi tute sawi dan takah emaw, thusawi mite an ni bawh a, a sawi ringawt atang pawh khan min convince ringawt mai kha a ni a. Chumi piah lamah chuan a thu in a fun tel leh a thu in a tum hi a chiang em em a ni. Chuvang chuan he Dan tha tak

mai, Bill tha tak mai kan han nei tur hi a lawmawm ka ti a, a Minister ang pawhin ka lawmpui tak zet zet a ni tih kha ka'n sawi duh a.

Chutihruah chuan nichina ka sawi ang khan kan Dan lama hnathawktute leh law enforce lama hnathawktute he kan Dan thar lo awm tur atan hian an hmanraw tha tak mai leh he Mizoram tana tun atanga kum rei tak mai hei hi engtikah nge kan siamthat leh ang tih kan sawi phak lova. Chutiang chu he kan Dan kan Bill hian arawn siam fel dawn a ni.

Tin, pakhat ka'n sawi leh duh chu eng damdawi pawh lo awm sela, sorkarin thu a chhuah a, chumi hnu ah Dan a lo nih a, drugs thar engemaw pawh lo piang sela, chutiang thlenga ngaihtuahna thui tak nei chungah hetiang Bill putluh a lo ni ta hi a lawmawm ka ti a, he Bill hi ka thinlung tak takin ka support a, pass ngei turin karawn support a ni e, ka lawm e.

DEPUTY SPEAKER : Le Er. Lalrinawma.

Er. LALRINAWMA : Pu Deputy Speaker, ka lawm e. Vawiin ah Dan tha tak mai, "The Mizoram Drug (Controlled Substances) Bill, 2016" chu kan nei thei dawn niin a lang a, a lawmawm hlein ka hria a. Kan hmaa member zahawm tak takte sawi ang khan he Dan hi ram hian kan mamawh tak meuh meuh a. Tin, mi tam takte sawi dan pheichuan heng proxivon kan han tih leh parvon spas kan tih avanga thi hi heroin ai pawh hian a tam daih zawk te pawh an ti a. Amaherawhchu, tuna kan Dan neih laiah hian, khang tuna ka damdawi sawiho te kha an lo awm si loh avangin leh hetiang lama thawktu, tlawmngai pawl leh mi hrang hrangte pawhin thahnemngaihna phochhuak turin harsatna kan tawk fo mai hi a paw em em thin a. Amaherawhchu, vawiin ah hei Dan tha tak mai kan han phochhuak tur erawh hi chu kei pawhin a hmasain ka thlawp hle a ni tih kha ka han ti ri duh a.

Tin, Dan chhung neuh neuh han sawi kai zel takah chuan nichina ka hmaa member zahawm takte sawi ang khan damdawi chhuak thar te pawh kan nei dawn a, (Christmas hma te chuan) a dah luih theih zel mai tur lai te hi a tha hlein ka hria a. Amaherawhchu a fund khawn dan tur chungchanga section 5-na (b)-na 'the sale proceeds of any drugs seized or property forfeited' tih lai hi, khatiang kha kan zuar ve mai dawn em ni damdawi hi tih lai hi a awm deuh a, nakinah pawh ngaihtuahna fim deuh zawk kan hman a ngai a. Chutilo chuan ruihtheih thil zuara inpuhna pawh kha thil hlauhawm tak a ni dawn a, chuvangin helai hi chu kan ngaihtuahna han tizau se a thain ka hria a.

Tin, a hrem dan kalphung hrim hrim lai hi sawi leh ta daih ila, Offence and Penalties section 9-ah hian dealer te licence te an pe a, tin a eia ei chi te hremna thlih thlih pawh an pe a, tin, a phurh a phur chi te, tin, chung mai bakah chuan a siamtute hremna pawh a pe zel a. Chutihlai karah erawh chuan ka rilru ah state dangte pawhin an neih kan thlir kual ve a, khangah khan sorkarin Dan kan siam a, a Dan siamtu sorkarin an bawhchhiat hi an lo haw em em mai lehngal a. Chuvangin keini hian sorkar hnathawkte hian he Dan hi bawhchhe ve ta se engangin nge an hrem ang tih lai kha an dah tel lova, hei hi chu ngaih pawimawh a tha khawpin ka hria a. Keimahni sorkar hnathawk zingah pawh hetiang lo ti duh mai te pawh awm a ni a.

State thenkhat Danah chuan an hna thleng pawha ban theih hial ang khawpin Dan te pawh an siam nghe nghe a.

Tin, chumai piah lamah thalai te, hna zawng lai te an lo nih te phei chuan khang hmanga convict an lo nih tawh te phei chuan State-ah hna pawh thawk thei tawh lo tur khawpin khatiang khan hremna an pe na a ni tih kha ka'n sawi duh a. Chulaia chu helaiah hian kan titel lem lova, a sorkar Dan siamtu sorkar mi leh sa kan nih vang nge? Keimahni kan indim deuh tih lai kha chu thuhran ni ta sela, kan rilruah awm se tha ka'n ti khawp mai.

Tin, helaia member zahawm takte sawi small quantity leh commercial quantity tih lai ah pawh hian thuchhuah tur tha tak mai kan nei a, tin, kha mi inkara section 1-na hian 20 niin ka hria, small quantity aia tam si, commercial quantity aia tlem si tih te hremna kha a rawn pe a, kha kha detail deuh hlekin medium quantity kan ti dawn nge ni, khatiang te pawh kha rawn phuah chhuak sela a tha khawpin ka'n ring a. Mahni in sawi buai palh te pawh thil theih a ni tih kha ka'n sawi duh a.

Tin, a dawt leh atan chuan, Dan hi a chak tawh em tih hi ka rilru ah alang deuh a. Dan hi eng anga tha pawh siam ila a chak tawh loh chuan thil hi a buaithlak khawp mai a ni tih ka sawi duh a. Section 19-na ah hian, 'offences to be cognizable tih a (b)-ah hian tihian a ziak a, 'No person accused of an offence punishable under this Act shall be released on bail or on his own bond' a ti tlat a, a hlim awm viau a ni. Amaherawhchu a hnuaiah hian, 'unless' a ti a, pahnih ngawt mai prosecutor thu leh hla a nih thu te leh a pahnihna ah hian, 'believing that he is not guilty of such offence and that he is not likely to commit any offence while on bail' a ti a, bail phalna kha a pe leh si ni. Kan thu kha a rum viau dawn emaw kan tih lai khan amaherawhchu a khawng viau dawn emaw tih khan min han thlah zalen sak leh deuh lai kha ania. Tin, section 24-na hi en leh ta ila, section 24-na ah hian, 'power to stop and search conveyance' tih a c)-ah hian, 'if it become necessary to stop the animal or the conveyance, he may use all lawful means for stopping it, and where such means fail, the animal or the conveyance may be fired upon' tih a ni ta a. Kah thawr phalna kha a pe leh mai dawn emaw tia, mahse ka duty ni ta se, 'all lawful means' han ti te te tur kha chuan ka in kap hman lo mai awm mang e aw, ka tia, leh lamah. Kan hmaa member te sawi ang deuh khan mihring chungchang a ni bawh si a fimkhur a ngaia, a Dan kha khauh viaua a lan lai khan a su leh ang reng viau a ni, chuvangin a khauh tawhlo a ni tih kha kan hlauh thu hla kan sawi duh a.

Tin, section 25 na ah hian, 'condition under which search of persons shall be conducted' a tih ah hian an ziak dan dan a, 'when any officer duly authorized under section 21 is about to search any person under the provisions of section 20, section 21-ah, 'he shall' a ti phawt a, 'if possible' tih a han belh leh a, kan tum angin kan kal chak lo ang tih kan hlau deuh a, a chak tur ang khan a chak lo palh ang a tih lai kha ka rilruah awm a.

Tin, section 34-na ah hian kan chhuang khawp mai a Department te, an tih tur an tih loh avanga officer te hremna tur lai hi kan ziak a. Section 33-na (1) leh (2) kan han chhiar a, 3-na ah chuan tihian a in ziak leh tlat mai a ni, no cost shall take....under sub section 1 or 2....of the government a ti. Thil ti thei tak tak leh lian tak tak te an khin tur a nih si chuan sorkara milian tak tak te an nih bawh si chuan, he lehkha hmu lo hian

helai Dan siamtute pawh kha kan hrem leh hleitheilo ang a tih te pawh kha rilruah awm deuh a. Chuvangin kan Dan hi a khawng viau rual laiah erawh hi chuan, awng hi a awm ang a, mi thil ti thei te put chhuak si hian, a rethei te hian kan tuar sawt sawt ang tih kha thil awm thei tak niin ka rilruah lang a. Kha lai kha chu engpawhnise, Rule siam hunah te pawh kan ngaituahna ti zau ta ila a tha in ka ring a.

Tin, 9 (b)-a kan hremna turah hian, a ei-a ei chi, a ruih chi lampang kha, nia, pawisa 10,000 thleng chawi theih a ni a ti a. Chutih lai karah chuan, section 20-na ah hian, 'power of court to release certain offenders on probation' a ti a, Section (b) a hrem tawh te hi chutiang khatieng ti te te a, Jail-a thun nghal mai lo in, medical treatment a thawn thei ang tih a ziak a. Helaiah hian jail hi a ziak a, heta a hremna 9 (b)-ah hian in jail a awm reng reng si lo a, hetia Dan bu a siam te hi a in kawlkah deuhlo maw aw ka ti a ni. 9 (b)-a a hremna zawng chu khatieng rui a kha 'rehabilitation to the compulsory detoxification' a ti a, pawisa cheng 10,000 thleng a chawi theih mai thu a ziak a, jail lam a ziak reng reng lo. Amaherawhchu, 20-naah hian jail tan thlengin a sawi leh bawk si a, a in kawlkah mai lo maw aw tih kha rilruah an awm deuh a.

Tin, a Dan thu ah nichina kan sawi leh bawk lai chu, 9 (b)-hi tieng hian an tia, amaherawhchu, 9 (b) chhanchhuahna tur hi section 20-na (1) leh (2)-ah hian a ziak leh tlat mai a ni. Khatieng khan Danin thiamloh chan tir tawh pawh ni se, section 20-na (1) leh (2) hian a rawn chhan mai piah lamah, section 38-na hian drug addict te kha, anmahniin rehabilitation an duh ngei a nih chuan, chutieng khatieng tih kha a rawn pe leh bawk si a. Anni pawh hi kan hrem leh hleitheilo mai ang tih chu thil hlauhawm tak a ni tih lai kha rilruah a awm a.

Tin, State dang siam te kan han en chuan, heti laia 9 (b) hi naupang tleirawl nupui pasal neilo te tana siam deuh bik a nih vangin a dim hle a, keimahni ah hi chuan tleirawl a sawi lo a, kha khan thil zawng zawng bawhchhetu te kha a rawn sawi tawp mai lai hian, hei hi chu kan ngaituahna kan sen zau deuh a tha lo maw aw tih kha rilruah a awm a. Tin, section 16-na hi nichinah kan member zahawm tak tak te khan an sawi a. Hei hi kan sawi ve duh lai chu, hriatthiam a har khawp mai a, ti hian a in ziak a, a section ah hian 'No suspension, remission or commutation in any sentence or awarded under this Act' a ti a. Ti hian a in ziak a ni, 'not withstanding under the court of criminal proceeding 1973 or any other law for the time being in force no sentence or under this act shall be suspended, remitted or committed' tih kha a in ziak a. Amaherawhchu 7 (b)-ah hian 'Drugs and Cosmetics Act, 1940 kha a tlawh chhan bawk si a. Khami a phuar tur thu hla ah khan, hei hian ava su buai lo maw, 'any other than' tih hi State dangte chuan an belh a nia, chuvangin 'any other than 7 (b) an ti deuh kher a, keini chuan kan dah lut tlang pawp mai a, hemi a thu thlukna laia kha a in kawlkah mai thei em, tih laia kha ka rilruah a awm a ni. Engpawh nise, Dan tha tak mai kan nei thar dawn a ni a, a lawmawm a. Tin, YMA, NGO te an hah em em, tieng buaipui hian kan member te sawi ang khan. Amaherawhchu, he Danah hian anni tel ve na, keini chu kan society a dang daih a, state dangah chuan, Dan siam te pawh State dang te pawh kan han melh kan han melh thin a ni. Keimahni vantlang nun leh kan khawtlang nun kalphung lai hi kan ngaituah tel ngai in ka hria a, chuvang chuan heng Danah te pawh hian YMA te tangkai taka an tel ve theih na tur te ni tel thei se a tha in kan ring a. State thenkhat ah te chuan special court te pawh an ti a, khating thlengte khan, thu buai hla buai rei loh nan hmalakna te pawh kha an siam thin a ni a, keini chuan helai proviso hi kan nei lem lo a.

Engpawhnise, ka duhthawhna thil vang a ni mai a, kan han sawisel ngawr ngawr pawh a ni chuanglo a, in lo thawhrimna ah chuan lawmthu kan sawi rualin, thahnemngaihna leh he Dan tha tak mai, pawisa pawh kumin atan 95 lakh lai mai kan han sen na tur thil te a nih vangin fimkhur leh tha zawka kan kal pui theih nan thahnem ngaih thu ah kan sawi ve a ni Pu Deputy Speaker, ka lawm e.

DEPUTY SPEAKER : Sawi tur kan la awm em? Pu Lalruatkima.

Pu LALRUATKIMA : Pu Deputy Speaker, ka lawm e. Hei wawinah hian The Mizoram Drug (Controlled Substances) Bill, 2016 sawi hona hun tha tak kan nei a. Kan Minister zahawm tak leh a department te in pekna a lawmawmin ka hria a.

He dan hi hun rei tak atanga kan ngahhle em em a ni a, tunhma in ND & PS Act, 1985 te, Drugs and Cosmetics Act, 1940 te leh Assam Drug control Act, 1950 te kha kan hmang a, kan ngaihthlak tawh ang khan damdawi chi hrang hrang a lo chhuak zel a. Ruih loh tura kan lo ngaih te kan lo rui ta zel mai si a. Kan dan hmanlai mek in a huap ve loh thil hrang hrang control na tur kha kan thalai ten an hmansual (abuse) miau avangin a lo tul ta a, vawiin ah he bill kan han ngaihtuah thei hi kan hnam tan thil pawimawh tak mai niin ka hria a.

Kan ramah ruihhlo harsatna hian nasa takin min tlakbuak a, min chim buai mek a ni a. Kan hriat angin Mizoram hi international drug trafficking route ah kan awm a, khawchhak lam atangin India ram laili leh Asia ram hmun hrang hrang te pan turin Mizoram hi kalkhan takah an rawn hmang a ni. Chung kalkawngah chuan thlah tawh a lo awm a, chung an thlah atang te chuan kan thalai ten harsatna an lo tawh a. Hei mai hi a ni lova, keimahni dan hnuai an zawrh medicine kan tihte ngei pawh kan thalai tam takin kan ngaihthlak tawh ang khan an abuse a ni. Chuvangin hemi a Bill in a ken tel thil tam tak a awm leh awmlo te pawh siam belh theih, a awm tawh tullo te pawh paih theih ang tura thuneihna a han pe a, a tul ang zela thil thar a lo chhuak a nih pawha siamthat zelna tur lo lang te kha a lawmawm khat chuan ka hria a. Kan tun dinhmun ah phei hi chuan kum 2012-ah khan Excise and Narcotics department ten an chhinchhiah dan phei chuan drugs related death hi mipa 39 leh hmeichhia 6 kan boral a, 2013-ah mipa 28 leh hmeichhe 9, 2014-ah mipa 36 leh hmeichhe 2, 2015-ah mipa 24 leh hmeichhe 3, 2016-ah phei hi chuan kan pung nasa a, mipa 47 leh hmeichhia 8 kan boral tawh a ni.

Tichuan, tun kum 5 kalta maiah khan mi 202 drugs related death kan nei a ni. Kan thalai, kan hmachhuan em em te, chhungkaw eizawngtu tur leh enkawltu tura kan ngaihte drugs in an nunna a la ta mai hi an kal zel na turah a pawh em em a, vawiin ah phei chuan eng angin nge kan khawtlang a tih buai, kan chhungkua a tih buai dan te sawi ngam pawh nilo khawpin chhungkua zawng zawng hi min tibuai ta vek mai emaw ni chu tih tur a ni a. Chumi rawn tawh lut tute, hemi hmanrua sum leh pai sumdawna atana rawn hmangtute lo beihna tur chuan dan tha kan neih zel theihna turin vawiin-ah Bill tha tak mai a rawn lut hi a tha hlein ka hria a.

Chutih lai chuan sorkar ang hian ngaihtuahna kan hman tur tamtak a awm a, vawinah te chuan drugs control-na ah te ngat phei chuan Central YMA te leh tlawmngai pawl hrang hrang te inpekna te kan appreciate lo thei lova, sorkar ngei pawhin a appreciate a. Chuvangin heng tlawmngai pawl ten tha an rawn thawh ve theihna tur kha

huang zau leh zel thei tur khan la awm leh zel sela tha ka ti a. A chhan chu kan Police force te, Excise force te an in daih tawk lova, chung karah chuan khaw tamtak ah te police force va pan tur leh rawn thleng tur chuan darkar 4, darkar 5 dawn ngaihna hmun te a awm a ni. Chung angah chuan kan tlawmngai pawl te, a bik takin YMA leh VDP kan han tih ang chi te pawh kha chhawr tangkai thiama, vawiina kan chhawr tangkai aia tangkai lehzuala ngaihtuahna kan hman tlan te pawh hi a tulin ka hria a. Tun kan dinhmun ah phei hi chuan 2012-2016 chhung ringawt pawh khan ND & PS Act hnuaiiah hian mi 534 zet man an lo ni tawh a ni. Khang zozai man a lo nih rual khan man loh tamtak an awm a rinawm a ni.

Chutiang te chu kan nih avangin he dan hian kan Police force te, Excise force te leh hemi kengkawh tute tha a ti chak lehzual turah kan ngai a. Chutih lai chuan a Bill ah hrim hrim hian authority chiang tak kha a lang lova, department pathum, Excise and Narcotics te, Social Welfare Department te leh Health and Family Welfare lam te kha kan han hmatheh lo thei lova, nakin zelah rehabilitation lamah Social Welfare hmalakna tur a nih rual in, a mantu lamah chuan Police force te leh Excise force te leh Drugs Inspector te pawh an ngai dawn a ni. Chuvangin coordination fel tak kan neih hi a tul takzet in ka hria a.

Tin, Section 5-a kan ngaihthlak tawh ang khan thil pakhat rawn lang chu, hmanrua kan man sa te kha a tihral kawngah khan State fund-ah lut turin fuhlo deuh a awm thei em aw ka ti a, hralh leh tur ang zawnga a ngaih theih a awm a ni. Chuvangin kha kha chu destroy emaw, engtin emaw a disposal kha uluk deuh zawka kan hotuten halral emaw, tihchhiat emaw a nih loh kha chuan midangin an lo hman sual leh te pawh kha awm thei a ni a, chung ang ah te pawh chuan kan fimkhur tel ka'n duh a. Tin, hemi Section V 2(d)-ah khan preventing drugs abuse a rawn sawifiah na ah khan drugs abuse kan han tih hi a har khawp mai a Mizoramah hi chuanin tunhma khan khawtlangin drugs abuse kan han tih kha kan hmuh dan chuan misual hmuhin kan hmu a ni. Mahse medical lamin an rawn thlir na atang chuan damlo ti khan an rawn thlir leh tawh bawk si a. Keimahni ah hian pawm dan hi thiam a har khawp mai a. Hetiang ruih hlo ngai, ti mi-te hi chuan a rem rem hi an ti mai a, an hmuh hnuhnun apiang hi an ti emaw tih mai tur a ni a. Zu in tur an hmuh in an in a, a piah lawkah an va kal leh a, engemaw ber correcting fluid thlengin an hmuh kha chuan an va ti leh chawt chawt thin a, kha khan harsatna min siam palh thei ang em aw tih te chu ka ngaihtuah a, engpawhnise ruihtheih thil substance abuse ang chi zawng zawng kha kan huam tir vek turah ka'n ngai a.

Tin, chapter V tho, section 9-ah khan a hremna 'punishment for contravention' a ti a. Hetah hian drugs license holder ten sorkar duhloh zawng leh phal loh zawng an lo zuar a, an lo kawl a, khatiang kan han man khan harsatna kha tunhma kha chuan kan nei tlem em em mai a ni. A hming chuan thubuai te chu kan han siamsak a, mahse eng tin tin emaw khan an chhuak zel a. Tunah erawh chuanin a hremna te pawh a lo na ta hle dawna. Chutiang anih chuanin miin sum kan duhna kawngah hianin mipuite hianin a tam ber zawk hi chu, ti mai teh ang, khua kan hmulo a ni, chutiang anih fo avang chuan drugs a lo hluar phah ni te pawh hian a lang a. Chuvang chuan a hremna te pawh kha a tha khawp in ka hria a, pawisa chawi tur a awm bawk a, jail tan theihna tur pawh kum 5 chhung thleng mai an dah kha tha khat viau chuan ka hria a. He Bill ah hian sawitur tamtak a awm ang a, kan sawi vek seng lovang. A section emaw, sub section te te kha chuan kan sawi vek seng lovang ang a, patent error te kha chu kan member zahawm

tak te khan an lo sawi vek tawh a, chuvangin khang zawng zawng kha kan financial implication rawn langah khanin kumin financial year chhung hian nuaih 63 a lo ngai dawn a. Kha kha kan Minister zahawm tak hian a tih dan tur a hria ah kan ngai a. Kumthar lamah chuan mumal zawkin kan dah thei turah kan ngai a.

Tin, heng drugs ti mi te enkawlna kawng ah hian rehabilitation chungchangah hian tan kan lak a ngai khawp mai a. Khawtlang ang te, tlawmngai pawl leh sorkar ang te pawha kan han thlir chuan NGO te hian min chhawk nasa khawp maiin ka hria a. Home-ah emaw kan han nawr liam leh ang chawt chawt a, anni ho tanpui theih dan turte pawh hi hun dangah te pawh a la awm zel turah kan ngai a, chutiang anih loh te pheih chuanin sorkar chuan tun dinhmun ah te pheih chuan Sethawn te kan ti a, Jail-ah han indah sen pawh a ni chiaah lova. Khang zawng zawngte pawh kha kan ngaihtuahnaah chuan awm sela. Sethawn pawh kum 20 kal ta dawna kan neih kha an ti hlamzuih lek lekin ka hria a. Khungahte khuan thil hrang hrang zir turte, eizawna tlaka rawn chherchhuahna tur hmunhna-te ruahman a ni thin a. Khungte pawh khu uluk leh zualin, nasa leh zualin tuai hnum ni leh ta sela. Rehabilitation centre tha tak kan nei a nih loh chuan, heng mite hi anmahni natna vei kalsan mai tur hi chuan kum tam tak a ngaih fo avang hian, heng ang chi kan Home hrang hrangin min chhawkna, tlawmngai leh Pathian rawngbawlna rilru pu a an lo enkawlna kan fak a. Anmahni support a, tanpui an ngaihnaah pawh sorkar ang pawhin theihtawp kan chhuah tlan hi a tul tak zet zet in ka hria. Vawiin-a kan Bill 'The Mizoram Drug (Controlled Substances) Bill, 2016 hian kan ram natna, chhungkaw natna, kohhran natna leh sorkar ang pawha kan buaipui hi nasa takin min chhawk ang tih ka ringin ka beisei tlat a. A Act-ah hian fello lai leh duh khawplo lai chu a awm thei e. Ama'rawh chu, kan sawi tawh ang khan Rules tha zawk leh famkim zawkte pawh kan nei ang a. Khang khan a la rawn tuaihnum zel turah ka ngai a. Chuvang chuan, he Bill hi a hlawhtlin nan theihtawp chhuah a, tan kan lak a tul hle-in ka hria. Chung chu ka'n sawi ve a ni e.

DEPUTY SPEAKER : Pu T.T. Zothansanga i lo sawm ang.

Pu T.T. ZOTHANSANGA : Pu Deputy Speaker, ka lawm e. Hla phuah thiam takin hla an phuah a, a thiam ve mang lovin kan sawisel luai luai emaw ni chu aw ka'n ti deuh a. Vawiin-a kan thu chai hi a ropui khawp mai a. Thenkhat hi chuan vawiin-ah hian ramri chungchang sawi hi kan chak ngawtin ka ring a. Sawi tur an ngah si a, mahse, kan sawi rih lo mai ang a. Mizoramah hian kum 30 hnuai lam thi thlanmualah hian kan tam ta khawp mai a. Ka hma-a member zahawm tak Pu Lalruatkima khan a thi zat te pawh kha a rawn sawi a. Mihring dam chin kum 70 tur a nih laiin, kum 30 hnuai lam thlanmualah an tam ta lutuk ringawt pawh hian kan society dinhmun hi a kawk nasa in ka hria a. Vanglaini-ah insunna column te kan han en chuan kum 30 hnuai lam, kum 20 hnuai lam hi a tam em em mai a. Tam tak hi chu drugs avang a ni tih kha ka'n sawi hmasa duh a.

Tin, census lamah te, Electoral Roll lamahte pawh hian khaw tam takah chuan mipa aiin hmeichhia te an han tam tawh a ni a. Heng atang hian vawiin-a kan thil tih hi a pawimawhzia kan hre awm e. Dan lamah hian hma kan sawn nasa khawp mai a. Kum 2008 inthlan dawn khan June thla-ah keini party hian manifesto-ah separation of judiciary kha kan han ti tan a. Tichuan, party dangin an sorkar laiin rem hre takin min han man khalh thoh mai a. A August thla velah separation of judiciary kha an han

puang chawp chung chung mai a, thalaite khawvel siamna tur ang nen khan. Ama'rawh chu, engmah kha an ti hman ta lova. Tun tum kan dan hi ka'n en ka'n en a. A sawsel zawnga han en dawn pawhin a felfai mang e aw, kan Assembly a lutah hi chuan a felfai ber te zing ami a ni ang a tihte kha ka rilru ah a rawn lut a, tha ka ti khawp mai a. Ama'rawhch chu, sangha te pawh hi han keu han keu chuan a uih lai a lo awm a ni an tih ang deuh hlek hian sawisel tur chu kan nei a nih ka ring, an han sawi teuh mai a. Mahse, kei chuan a uih lai ka hmu chu a ni hran lova.

A pawimawh ka'n tihna em em leh ka lawmna em em mai chu chapter III-naah hian state fund for control of drug abuse a rawn ti a, hei hi a ropui ka ti a, a lawmawm ka ti khawp mai a. Tunah hian drug chungchangah dan mumal tak, tha tak kan neih rih loh avangin kan Home Minister te pawh hian hma an la nasa khawpin ka hria a. Ka hriat sual loh chuan tunah hian kan budget leh engemaw a hranpa a awm si lo, kan Home Minister pawhin a thehchhuah ringawtah pawh hian, hemi a buaipuinaah hian a ti che tam khawpin ka hria a. Police department-ah 70 lakh, Excise Department ah 30 lakh, Central YMA ah 15 lakh kha a pe a, 15 lakh kha a pe leh dawnin ka hria a. An pe tawh em ka hre lova. Tin, tun Christmas lo awm tur vela tan hian Central YMA ah 8 lakh pek leh a tum bawk a. Khatiang kha rem leh rem lo chungah thahnemngaihna avanga a rawn slice out kha a ropui ka ti a. Tunah mumal takin state fund a han awm tawh tur hrim hrim hi a lawmawm ka ti a. Hei hi Mizoram tan thil thar a ni. Josefa buhzem kan tih ang deuh khan mangang apiangin an pan tawh mai dawn a ni. Hei hi a tha a, ka'n en ka'n en a, lawmawm ka ti a. YMA in kan han halral chur chur ang chi te pawh hi a tha viau na-a, damdawi hlu leh eng emaw deuhte hi chu hetah mumal takin a dahthat theih a ni. Nichina i vei lam ami ten an rawn sawi khan man sa tih ral dan kha an rawn ngaihtuah nasa khawp mai a. Mahse, dan ang takin a tawp lamah khan a awm vek a nia kha kha. In chhiar kim lo palh nge ka hre lova, lo ringhlel lo hram rawh u. Confiscate dan vel kha a tawp lamah khan tha deuh a awm a nia. In hmanhmawh a in chhiar hman lo mai mai a nih kha.

Tin, a ropui lai tak chu kan State Legislature in an amount The Government may after the appropriation by the State Legislature by Law in this behalf provide a rawn ti a. Kan State Legislature hian a hranpa in he fund atan hian sum hi a rawn ruahman thei tawh a ni. Term hmasa khan nichinah member zahawm tak Pu Rina'n a rawn sawi a. Champhai District-ah chuan MLA ho khan 1 lakh theuh kan thawh laite pawh kha a awm a. Ama'rawh chu, khatiang ngai tawh lo khan, kan Home Minister pawh a hranpaa tan ngai tawh lo turin state fund kha drug control nan a hranpaa a han awm tur hrim hrim hi a lawmawm a ni tih kha in rawn sawi tlem khawp mai a, kha kha a lawmawm a nia. Zoramah kan mamawh nasa.

Tin, expenditure tih dan tur mumal takin a rawn ti vek a. YMA te pawhin kan man kha halral tawp tawp mai lovin, a damdawi hlu chin leh engemaw deuhte kha chu thuneitu ten uluk taka enin kawl that dante pawh kha a awm a ni. A tak takah chuan kan damdawi tha tam tak hi chu damlo ten kan mamawh hi a tam a nia, to deuh deuh si. Khatiang deuh chi te pawh kha rilru-ah min lo hriat sak ula tha-in ka hria a.

Tin, Pu Deputy Speaker, ka'n sawi duh chu ND&PS Act-ah khan small quantity 5grams tih ang te, a number kha a inziak thliah thliah thin a. Kha mi kha tha kan ti lo nge ni, state in a tih hranpa ni lo khan a Act ah hian a small quantity kha chu lang

mai se tiin ka lo awt khawp mai a. Ama'rawh chu, Gazette atangin a la rawn tih leh theih tho si avang erawh chuan tha ka ti a. Medicinal purpose atana kan lak chhuah hrim hrim pawh hi en ngun deuh ngai ka ti. Rilru-a kan hriat ka'n duh chu doctor in a rawn prescribe chuan kan pe chhuak mai thin kha a ni a. Ukil kan nih lai khan kan buai nasa a, Doctor hian an rawn ziak mai thei vek thin kha a hahthlak lai chu a ni. Miin an mamawh a nih chuan an ziak vek mai a. Ka rilru takah pheih chuan a Board deuhin an en deuhthe hi a ngai em aw ka ti a. Doctor practice tha mumal mang lo thleng khan an rawn ziak mai zel a. A pawm loh theih si loh a, khalai tak kha a buaithlak lai kha a ni thin a. Kha kha rilru-ah ka'n hria a.

Tin, Pu Deputy Speaker, a minimum punishment kha ND&PS ah khan 10 yrs a ni vek mai a. Helaiiah hian kan han ti kan han ti a, 'may extend to' tih hi a ni ta vek mai a. 'May extend to' a nih hi chuan, rin ai in an tang reilo duh khawp mai a. Helai te pawh hi rilru ah chuan a awm a. Entirnan, a minimum te kha thla khat emaw lek pawh ni se 'may extend to' a nih chuan ni khat, ni hnih, ni thum vel convict hi Court-ah hian a tam lutuk thin a. Hei hi an chhuak zung zung leh lutuk ang tih hlauhna ka lo nei ve deuh a, tlemin ka lo hlauthawng deuh a nih chu. Helai no.12-a a rawn sawi ang deuh hian 'not less than two years' a rawn ti pawp mai a, helaiiah illicit trafficking leh harboring offenders a rawn tihah hian. Khalai a sawi ang deuh khan hmun tamtakah hi chuan 'not less than' han tih hi reilote pawh ni se la 'not less than 1 month, not less then 2 months, 3 months te tal hi ni se chuan a zia ang em aw chu kan ti ve tho a. Mahse, nia thahnemngaihna vang a ni a.

Tin, member zahawm takten kan hriat atana kan duh chu he dan hnuaia thil tihsualah, hei Indian Penal Code-ah te hi chuan mi an man hian a mantute khan witness fel tak nen an prove vek 'beyond reasonable doubt' a nih loh kha chuan convict theih loh a ni. He danah hi chuan 'culpable mental state', hei hi court khan anmahni ah khan diklo a awm a ni tih kha a zuk ring nghal ringawt a. Tichuan, anmahni an insawifiah ve tur a ni tih kha a rawn ni ta a ni. Khalai te kha no.17-ah khan a inziak a. Kha kha min lo hriatpui ve hrim hrim ula.

Kan Dan hi a tha khawp mai a, ka'n en kan en hian mithiam tak kuthnu a nih hi mawle te ka'n ti a. A hnu ah nichin lawk khan kan Deputy Speaker pawh kha a lo tel reng tih ka hria a. Ani hi a buatsaihtute zingah kan Minister zahawm takin hma a lakna ah khanin a fatu head te zingah a lo tel niawm tak khan an lang a, L.L.M. professional reitak lo practise tawh a ni bawk a, a zia khawpin ka hria a, lawmawm ka ti a.

Tin, helaiia tha ka'n ti leh deuh mai chu, Section 32-ah hian miin an nawm maka mi an va dap hmingchhiatna ngawt dan te kha a rawn humhim ta a. Entirnan, Pu Piana hi tihmingchhiat tumin va kal ila, va dap ve ringawt mai ila a hmingchhe em em mai dawn a ni. Khatianga tul hleilo a mi va dap ang chi te kha a veng khiau mai a, a lawmawm ka ti a. In ngaihtuah zau ka ti khawp mai, a lawmawm hle a ni tih ka'n sawi duh a ni.

Sawi tur chu a tam a, thahnemngaihna avangin YMA te pawh an tha thawh tel theihna tur kha han ziahlan ni se tih ang chi te pawh veilam ami te khan an rawn sawi a. Kha kha chu sorkar nen tha taka kan thawhhona hi a tawkin ka hria a. Heta chiangfaka

writinga kan dah hi chuan a diklo thei a, hun kalzel atan a fuhlo thei a. Amaherawhchu, tuna kan thawhho ang hian sorkar agency- Excise leh Police te leh a nodal department ho te nena inrem taka an thawhhona kha a tawh hle a ni tih kha kan sawi tel duh a ni.

Vawiina kan dan hi a tha a, Zoram tan history a ni a, penkhatin vawiin ah hian hma kan sawn leh dawn a ni. Tunhma khan Assam Drugs Control Act hmang te khan hetiang hi kan han buaipui thin a. Khatiang khan Court hniamah kan han convict a, amaherawhchu appeal ah an tla lehzel a. Tin, Drugs & Cosmetic Act, 1940 te, ND&PS Act ang chi te, khatiang chipchiar lutuk mai kalkan a hetiang kan Ministerin remhre tak maia a rawn chhawpchuak hrim hrim hi a lawmawm kan ti a. Mizoram hi an hrechiang mang e, Zoram mil takin hetiang hi a rawn chhawpchuak thei a ni a, a lawmawm mang e ka ti a.

Tuna ND&PS strict lutuk hnuaiah hi chuan in convict te hi a har em em mai a. Khatiang kha hre rengin mawlmang zawkin, kim siin, Mizo rilru milin hetiang an rawn chhawpchuak hi a thain ka hria a. Opposition lam te khan a kimlohna kha an han sawi deuh zeuh zeuh tak na a, naupiang pawh hi a puitling nghal thut lova, tlem tlema chawm chhoh a thang chho deuh deuh tur a ni tih hi kan hriat ve a tha. Vawiin ah hian kan ram tan dan tha tak a rawn piang a, a puitling nghal thut turah i ngailo ang u. Chuvangin kan hotuten luleta an ngaihtuah tawh hi ti hian kan han tichho ang a, kan ram tan, kan hnam tan, tanrualna nen, thawhhona tha zawk nen kan tangkaipui beisei ila. Kan opposition hotute hian a rem leh remlo pawh sorkar beihna ah hian in hmang ang tih hi ka hlau khawp mai thin a. Hei hi chu kan hnam issue a ni a, kan ram issue tak tak a ni a, opposition leh opposition lo lam pawh a ni lo. Chuvangin kan thlawp tlan a thain ka hria a, loophole eng eng emaw deuh lai te chu lo awm mahse, helaia in thut reng theih dan tur hi chu ka hre chiahlo na a, kan la sawiho chho zel ang chu mawle tiraw (Pu Rinawm.)

Kan opposition hotu thenkhat te hi chu an vannnei ka ti a, term leh ah opposition a an awm leh phei chuan thil hi an hrechiang dawn khawp hian kan hre mai a. Engpawhnise hei vawiin ah dan lawmawm tak mai kan nei a, hei hi lawm takin ka rawn thlawp a ni. Ka lawm e.

Dy. SPEAKER : Sawitur kan la awm em? Aw, Pu Zawma.

Pu VANLALZAWMA : Pu Deputy Speaker ka lawm e. Ka hmaa sawitute sawi kha kan support-in tihian dan tha deuh mai kan han duangchho hi a lawmawm ka ti a. A pass-tute zingah pawh kan tel ve dawn ni te pawhin ka hria a, a lawmawm takzet a.

Kan ngaihtlak tawh ang khan kan buaipui dan zawng zawng te leh mumal taka han hrem ngaihna awm si lo, kan member zahawm tak Pu Sangkunga sawi ang deuh a a zuartute nen pawh a tuk lawka bazarho leh dual dual tih vel lai te kha chu thil dik a nih dan a awm a.

Chutihlai chuan helamah a mantu, police lamte leh magistrate lamte pawhin ti viau dawn ila mumal taka hrem dan kan neih si loh avang khan tiin ka hria a, a awmlo a ni tih kha tumah kha indem hleihtheih pawh hi kan ni lo niin ka hria a, hetiang kan han tichho hi a lawmawm khawp mai a. Chutih meklai erawh chuan thil pakhat kan zawt kual a hei chhiar Chiang hote pawh. Kan buaipui lai tak kha kan la hit lo em ni aw

ka ti a, a point taka hi kan la hit lo in ka hria a. A chhan chu a ruia te hi engtinne ni tihlai hi? Chu chu helaiah hian a tel tawlo deuh tlat in ka hria a. Pu Sangkunga te, Pu Mavala te ho leh Pu Zothana te ho te pawh kha kan be kual a. Chulai te chu a chianglo riau a ka'n ti a, hei Pu Mavala min rawn pekah hi chuan mahse chu chu ka chhiar chian hmanloh avangin khalai kha pan angreng deuh hian a awm a. Drugs rui, a ngawlvei leh khatiang ho kha kan la dim, khamite hremna tur kha a la awm chiahlo deuhin ka hria a. Hei hi a tel dan a awm em? Chumi tello chuan a la famkimlo deuh riaua hriatna ka nei a. Zuk leh hmuam do ah kan hotute hian an titha hi ka tih riauna a awm a. Cigarette zuar emaw, vaihlo emaw, siam emaw lam hi kan nawr vaklo a, a meizutu taka kha kan buaipui a, chawi te pawh kan chawitir a. A chhan chu a tuartu a ni a, tin a dan bawhchhetu tak kha a ni. Cigarette hi ak ringawt ila, zu miah lo ila engmah buaina ka taw lo, ka zuk khan ka buai a ni. Tiang deuh hlek khan, heng thu hi wawiina kan Bill enah pawh hian a zuartute leh a lo phur kualtute leh a lo kawltute te kha hremna na deuh deuh kan pe a, mahse a rui a te tak leh a addict a tak te kha engtinne kan tih tih hi a lo lang det det a hi a awm a tah hian.

Chapter 5, no.9 (b)-ah khan a awm a. Kan chhiar ang e, “Where the contravention involves use or consumption of the controlled substances without valid medical prescription by any means route of intake in any chemical form, such persons shall undergo with compulsory detoxification and to be followed by rehabilitation and also will remain under observation and probation; and such persons shall also be liable to pay a fine which may extend to ₹ 10,000,” tih kha a ni ta a.

Kha kha a nih mai chuan a va ho deuh em aw ka'n ti a. A chawi tur te phei chu anmahni khan an chawi leh dawn chuanglo a, an nu leh pa te emaw in an chawi dawn a ni, ₹ 10,000 pawh lo chawi tehreng ila. Tin, Jail-a khung dan hi a awmlo niin ka hria a, hei heta tang pawh hian. Compulsory intoxication te a ti a, doctor ten emaw an ruihloh theihna turin an kua te an thuah sak dawn nge, engtinne an tih dawn tihna ang chauh a ni a. Chutah rehabilitation lama thawm tur tih kha a ni ta a. A buailai tak, kan buaipuilai tak a mihringa kha kan duat lutuk lo maw ka'n ti deuh a. Helaiah hian No. 4 pawh hi dawhkanah hian awm reng se la, tuman injection nan em kan hmang a nih loh hi chuan, a awm a ni mai a. Kan Minister zahawm tak pawh hian No.4 kha ak reng pawh ni se, engnge buaina em em awm? Khati zawng khan miin hman an duh khan kan buai ta a ni. Khalai tak, khami te tak hremna kha awm ta se a va dik awm em aw ka'n ti a, Pu Deputy Speaker. Khami tello kha chuan hei hi buaithlak riau dan a awm a. A tuartu tur te chu a addict lo ho zel kha, a pawisa chawitur te leh tang tur te pawh. Miin an lo zuar a nih pawhin, anmahniin an tih loh chuan an tang ang a, a hmang thin tak kha chu a him lel dan kha a awm a ni. Nichina member zahawm tak Pu Ruatkima'n an sawi te pawh kha a dik em em; kha mi tamtakin an thih phah a ni. Entirnan, khatiang rui an man chian leh addict kha kum 5 te tan tur ti ta se tamtak hi an thi miahlo ang. Jail ah te kum 5 zu awm vang vang se an thih a rinawm loh a ni. A zuar mai pawh khati khawpa kan hrem theih si lai khan, engatinge a rui thin ho hi hrem ngaihna, hrem dan tur awm mumal lova he dan hi kan siam tih kha Pu Deputy Speaker, belh a tha lo maw ka'n ti a. Chu chu he dan kan tih tihlawhtlinna tur, a taka a rah lo chhuak kan hmuhna tur hi a ni dawn lawm ni aw ka'n ti a.

Nu leh pa tam tak buaiziate kan hria a. An fate buaithlakzia te, khang zawng zawng kha dan mumal lova, entir nan tunah hian he dan hi hmang pawh ni ila kan

faten lo addict-in lo buai viau se, Jail-ah te an awm mang bawk si loh chuan kan buai reng thei tho a ni. A zuartu lam atanga a ruka hetia a kal reng bawk si chuan. Chulai tea chu tih belh dan a awm em? Engtin nge hetah hian helaia lang hi chu a nep angreng viau mai bawk si a tih kha Pu Deputy Speaker, ka'n sawi duh a.

A dan hrim hrim kan han siam thei tur hi hi chu a tha a, mahse a pawimawh lai tak, entirnan tunah pawh kan hre vek a, phalna neia zu zuar theih te, zu kan zuar a, chutih lain phalna neiin miin an in a. Mahse a rui hremna tur hi kan nei a ni. Engzatnge kan hrem chiah chu ka hre lova. Phalna neia sorkarin kan zawrhtir, phalna neia miin an in kha an ruih deuh tawh chuan kan hrem dawn a ni, chu chu dan kan nei thlap a. Hremte pawh kan hrem tawhin ka hria a. Mahse hemi zawka hi, a rui hremna tur lai hi a la mumal lo lutuk lo maw Pu Deputy Speaker, tih kha sawisel hranpa pawh ni lovin, a la famkim lo ve tiin thahnemngaihna in ka'n sawi a ni.

A Bill hrim hrim hi ka object lam ni lovin kha zawk kha belh leh dante a awm lo maw? A kal fel tawh si chuan a buaithlak thei phian lo maw ka'n ti a chu chu ka'n dinpui ve a ni. Ka lawm e.

DEPUTY SPEAKER : House Leader hi kan Minister-in a wind-up hmain sawi duh a neih chuan.

PU LAL THANHAWLA, CHIEF MINISTER : Pu Deputy Speaker, ka lawm e. Ni e, ruihhlo hi kan buaipui nasa a. Tuna Opposition Group Leader han rawtna te kha rawtna tha tak a ni a. Amaherawhchu drug addict ho hi khawvel leh mithiam tena an pawm danah chuan damlo, tanpui ngai lampang zawng hian an ti tlat mai a. With understanding-a enkawl tur a ni an ti a. Khatia han isolate khan a hlawk ang em? A tha ang em tih erawh chu very questionable a ni ve thung a. Chuvangin helaiah hi chuan ngaihdan fumfe tak tunah mai chuan han siam hi harsa ka ti a. Amaherawhchu nakin zel atan erawh chuan corrective measures te lak dan a awm loh chuan a zuartute ringawt hrem kha a tha ber ang em? A addict-a te lampang zawk hi engtin nge kan tanpui ang tih kha a ni a.

Nichinah khan member zahawm tak Pu Ruatkima'n a rawn sawi a. Sethawn te pawh a tira kan hotute ngaihtuahnaah chuan, 'tiang ho hi kan nei chho tial tial a, chuvangin khulailah khuan kan dah ang a. Hmeichhia leh mipa an hrang a, Chapel te pawh kan siam ang a. Kan Pastor leh kan mi thahnemngaiten Pathian thute hrihlin an kaihruai ang a. Tin, tlema a lo vengva deuh tawh leh tha deuh tawhte kha chu eng emaw handicraft lampangah thil kawng hrang hrangah zirtir an ni ang a, tih ngaihtuahnaa kan hotute siam a ni a. Khata tana partner turte pawh kan zawng nasa a. Salvation Army lamah te, anni social work lamah an kal nasa a. Tin, Catholic lampangte pawh Bombay atangte pawhin kan inbia a. Mahse, kan final hmain keini kha kan chhuak ta a, engemaw tak chu tih zui chu niin ka hria a.

Khatiang zawng deuhtea tih a nih loh chuan tunah pawh kan sawi tawh ang khan mi thahnemngaiten Home-te emaw an han siam a, hei hi an thahnemngaih vanga harsa taka siam tam tak hi an awm a. Financial Assistance hi an mamawh khawp mai a, a chang changa an khawna mi thahnemngaiten an lo tanpuina bak hi chu an nei chiah lova. Tin, tun hma khan Social Welfare Department lamah central lam atangtein assistance an

hmu thin a. 'Khatiang khan an ti tawk tawk chhova. Chuvangin pawimawh hmasa ber chu a awm lohna tur atan theihpatawp chhuah kha a ni a, chu chu heta kan dan hian a tuma kha a ni a.

Cigarette-te nen hi chuan a compare theih ang em aw ka ti a. Cigarette hi tunah hian a manufacturers-te an hrek dan chu central sawrkar pawhin budget apiang hian a man hi a tipung chho zel a. Manufacturing Company-te pawhin nasa takin an complain a. Mahse Supreme Court a inrawlh a, khatiang khan tih a phal lova. Chuvangin helai thil hi ni e, rawtna tha tak a nih laiin kan hotute ngaihtuahnaah riak chho zel sela, engtin nge kan tih ang tih kha kan la ngaihtuah ang a.

Tun ami hi chu kan eptu pawl atangte pawhin generally-in tha an tih avangin pass phawt ila. Tichuan engti takin nge kan enkawl ang tih hi ni e, kan kohhran lampangte nen te pawh la ngaihtuah ho tur em ni ang? Jail-a indaha insiamthat rikngawt chi chu a ni tlat lo a ni. Tin, India ram Jail thenkhatte pheih hi chu an corrupt khawp a, a available reng a, drug addict-te tan khan a awm thei reng a, Chutiang khawp chu a ni a. Chuvangin, tuna generally-a kan han kalpui tumna, kan Minister zahawm takin Department te nen uluk taka an rawn en a an rawn put luh hi pass phawt mai ila. Tuna kan member zahawm tak Opposition Group Leader-in a rawn ngaih pawimawh leh ngaihawm angtte pawh kha thil tih awm tak chu a ni. Mahse engtinngge ni ang tih hi tuna dan atang hi chuan han siam mai dan a awm rihin a lang lova. Chuvangin uluk zawkin, ngun zawkin la ngaihtuah ila, tuna Corrective Homes awm angtte pawh hi engtinngge kan tihchangtlun zawk ang tihte kan la ngaihtuah chhoh zel hi a pawimawh a.

Tunlai hian drugs ang tluka pawl kan buaipui chu depression neih vanga mahni intihhlum tum emaw, harsatna insiam ho hi an ni a. Khatiang buaipuitu rual khan min rawn hmu nghe nghe a, Social Welfare Department te nen te pawh thawhhona an nei a. Tin, khatiang zawnga kan mithiamte an hah khawp a. Eng hunah pawh, zing dar 1:00, dar 2:00-ahte pawh va phone chawt mi mangang tawpkhawk, khang hote an advice, an guidance va dil kha an awm reng a.

Chuvangin hei hi social problem lian tak a ni a. Sorkar initiative pawhin, department initiative pawhin, kan tlawmngai pawl, kohhrante leh keimahni helaia member zahawm takte nen pawh hian kan la sawiho loh chuan department emaw, sorkar emaw, kohhran emaw, tlawmngai pawl emaw ringawt chuan tih chi a ni dawnin a lang lova. Chuvangin khatiang zawng khan hmannia kan inhmuhkhawmna atang chuan ngaihtuahna kan lo siam tawh a. Drug addiction atanga lo kal nge ni depression hi tunlai hian a tam khawp a. Doctor hre thiam tak takten an thu sawite ka han ngaihtla a, a ngaihawm khawp mai a, khang atang khan engtinngge kan social problem lian tak hi a ni tawh a. Tin, hemi rual hian AIDS hi tun ang zela a kal chuan kan hnam runtu hlauhawm berte zing ami a ni bawk a.

Heng zawng zawng hi ngaihtuahna thuk tak nen Pathian rawn chung a ngaihtuah chi a ni. Amaherawhchu, tuna kan Bill hi erawh chu a hmahruaitu atan kan member zawng zawngin, a sawi tawh zawng zawngin an rawn support bawk a, pass phawt ila, a hnu zela kan ram, kan hnam kan humhalh a, khawtlang nun kan siamthatna tur ang chi hi chu zau zawka la sawi ho chi niin ka hria. Pu Deputy Speaker, ka lawm e.

DEPUTY SPEAKER : Le, kan sawihona kan duhtawk tawh ang a. Tunah chuan Minister-in memberte ngaimawh laite hrilhfiyah theih a neih chuan han hrilhfiyah pahin pass dil turin i lo ko ang.

PU P.C. LALTHANLIANA, MINISTER : Pu Deputy Speaker, ka lawm e. Member zahawm tak takten thahnemngai takin vawiina kan Bill kan sawiho va. A tlangpuiin Bill-in a tum leh a target leh kan mamawhna ah chuan tha kan ti tlang hle a, a lawmawm ka ti a. Tin, Pu Deputy Speaker, member tam tak te hriatthiam loh lai deuh emaw dukkhawp loh na lai emaw, kha kei tehluh hian ka sawifiyah vek seng in ka ring lova. He drafting committee-a Chairman i nihna te pawhin Chair atang te pawhin he bill chungchang ah hian sawi duh te pawh i neiin ka ring a, ka'n ngen ve hrim hrim duh che a.

A hmasa berin Pu Deputy Speaker, nichina ka move laia ka sawi ang khan kan ram-ah kan hman tangkai em em te kan tan hlauhawm a ni a. Kan damna te kha kan dam lohna, kan thihna thlen tute a lo chang zo ta a. Chung ang bei a, do let tur chuan Dan kan mamawh a, 'Dan awm lohna ah chuan bawhchhiatna a awm thei si lo a' tiin Bible-ah kan hmu a ni. Chumi tak mai chu vawiin ah hian kan tum ber mai a ni a. Dan neih a kha a famkim tawh lo ang tih ka ring a, a fel tawh lo ang tih pawh tam tak ah a rinawm a ni. Chuvangin, Dan avanga soal hriat famkim-na lo awm tur kha vawiin ah hian kan neih a tul si a. Kha kha member ten kan hriat a tul hle in ka hria a ni. Nichinah member zahawm tak Pu Zawma khan a drug user te hremna dan helaia awm ringawt hi chu a nep deuh ani lo maw? tih kha arawn sawi a. NDPS Act, 1984 section 64(a)-ah khan a user te kha rehabilitation a detoxification a an kal duh lo, enkawl a an awm duh lo a nih chuan jail a khung tur a ni. Chuvangin, NDPS Act-a a awm tho avangin helai ah hian thui takin ziak a ni lem lo a ni.

Tin, kan House Leader zahawm takin a sawi ang khan helaia an thlir na key ah hi chuan rehabilitation emaw, reformation centre lam ang chi a heng ruihhlo ti tu te hi chu enkawl hi an duh dan tlangpui thin a ni. Tin, leh lam ah nia kan han sawi ho a, Dan siamtu kan nih lai hian a kengkawhtu nih kha kan han tum thwak thwak thin bawh a. Kha lai ah khan 'ta se ta se' tih kha a tam khawp mai a. Khang zawng zawng kha vawiin ah hian kan in hrilhfiyah seng lo ang a.

Tin, kan member Pu Ruatkima MLA zahawm tak ten kan NGO ah te thahnem ngai takin an thawk a, kohhran ang te pawhin an thawk a. Heng te pawh hi huam tel theih hi ni sela an tih ah khan hetah chapter 7 Miscellaneous-a section 42 sub-section 2-ah khan sorkar in ruihhlo ngai te enkawl na hmun te, enkawltu turte a tul ang kha ruahman turin rules a siam thei em tih a ni a. Sorkar-in khami kawnga a ruahman na ah khan, rules-ah khan a duh chuan a huam tel thei ang tih kha a rinawm in ka hria a, kha lai ah khan an bang mai mai in ka ring lova. Tin, kan sorkar-ah kan Chief Minister zahawm tak hian vawiina kan bill pawh hi ngai pawimawh hle lo sela chuan vawiin hi kan thlen ka ring lo va. Nichin ah kan awmho-na-ah ka sawi tawh a. Tin, helam pang hi.....sorkar in kan hotuten an ngai pawimawh a. Heng NGO hetiang lama thawk te tan liau liau hian kan term hmasa sorkar ah khan kan Chief Minister zahawm tak hian vaibelchhe khat a dah a ni. Chutiang chu Mizoram ah state plan atanga vawikhat mah la dah ngai loh a ni. Chu chu kan Home enkawltu te leh hetiang lama thawktu te hnenah kan pe a, an insem a. Chutiang chuan vaibelchhe 1 kha kan bul tanna a ni. A hnu ah

chuan vaibelchhe 1 chiah kan tih theih loh pawhin chutiang chuan vawiin thleng in tanpuina hi kan theih ang ang in kan pe a. Sorkar plan sum atanga kan neih loh pawhin Pu Deputy Speaker, tuna a hnuhnung ber ah pheih hi chuan department in Finance kaltlanga interest kan neih vaibelchhe 2 chuang pawh Mizorama hetiang lama thawktu tam tak te hi a nuai tel in kan pui a, kan pe mek bawk a ni. Chutiang chuan kan sorkar in a ngai pawimawh em em a ni tih hi vawiin ah House kaltlang in Mizoram mipui te hnenah ka puang duh a. Kan Chief Minister in hetiang lam hi a ngai pawimawh a, theihtawp a chhuah hi kan vannei tak zet a ni tih ka sawi duh a.

Tin, a hmalak-na kawng-ah a eng department ber nge, enge hmalakna kha a chak taw lo thei a tih thil thu ah nichina hlauhthawanna an sawi ah khan; helai a kan Dan chapter 2 section 3 sub-section 4-ah pheih chuan sorkarin district level ang ah pawh Guwahati High Court-in Coordination Committee kha District Judge te chairman na hnuai ah din in, a concern department deuh te kha kha Coordination Committee-ah khan telh in Committee a din thei ang tih a ni a. Khuta Guwahati High Court vela in tih kher kha chu CJM te chairman an lo nih dawn chuanrawn a lo ngai a, chu chu a nia. Chutiang khawp chuan state level lo ah pawh district level ah khan hmalak na chak zawka a kal theih na turin kan Dan ah hian a zia lang a.

Tin, chapter 2 section 4-ah hian hmala tur bik kha sorkar in a duh chuan Joint Secretary rank level kaihhruaina hnuai ah a concern department hrang hrang ho te kha ruat khawm in, chung atang chuan local officer te pawh ruat in chak taka hmala tur bik a kha department hrang hranga mawhphurhna kan neih rual khan hlawm khat ah pawh a tih theih na turin hian a rawn thailang bawk a ni tih kha ka'n sawi duh a.

Tin, nichina section 16-na hi engeni a awmzia tih member zahawm tak te sawi ah khan he Dan hmanga mi convict anih tawh chuan eng dan dang hmang mah in kha convict a kha remission a pek theih loh tihna a ni. Jail-a kan tan chuan Superintendent hian remission a pe thei a. A chang chuan Governor pawh in a pe thei, Chief Minister pawhin a zu tlawh chuan convict tawh kha remission pek a ni a. Jail ah chuan convict tawh hian eirawng an bawl vek a, engkim hna an thawk a, an record that dan a zir khan remission hi kum 1-ah hmuh theih zat te an nei a ni. Ama'rawhchu, he Dan hnuai man te convict tawh kha chu eng Dan hmang mahin remission kha an enjoy ve thei lo ang a ti hial a ni. Chu chu a kalphung niin a lang a. Tin, khatianga man han tihral tih vel a kha enge ni tun-ah kha drugs abuse a kha an man khan kha damdawi kha damdawi in ah chuan tangkai taka hman theih a la nia. Min a hmansual avanga tha lo helaia an man kha tha taka hman tangkai theihna hmun-ah a tul anga hman leh kha he Dan hian a tum pakhat kha a ni thei a ni tih kha member zahawm tak te pawhin min hriatthiam pui kan duh a. Tin, a tam lam, a small quantity tih te kha chu a tlangpuiin Magistrate emaw, Judge te emaw, discretion power, an power a nihna a awm a ni. Engemawchen ah kha kha kan hotu ten an rawn tih dan tlangpui a ni a.

Tin, kan sawi tam tak kha chu a spelling emaw, a saptawng hi heti zawng hian ni zawk se han tih vel kha a tam ber tlangpui kha a ni a. A lawmawm hle in ka hria a, House-ah theihtawpa uluk taka kan officer ten an tih tawh hnu ah pawh fel hlel deuh ala awm a ni e ti thei khawpa kan MLA te, Legislative Member mi fel tak tak kan nei hi Pu Deputy Speaker, Zoram in roreltu kan nei tha hle ti zawngin ngai ta ila a tha in ka hria a, in inpekna te a lawmawm ka ti a. Kan Dan-ah hian a Greek tawng te chu awm se, a

Greek tawng te nen en tlan a, a khawi nge dik zawk tih kha a tha viau a. Ama'rawhchu, a Greek tawng kha a awm ve lem loh avangin, tihvel ah hian a dik thei e a kawk tho e tih vel kha chu a awm thei a. Chuvangin, he House zahawm tak ah hian Pu Deputy Speaker, heti zawng hian ni se a tha lawm ni, kha kha so us such han tih vel kha kan tih chuan a rei dawn lutuk a, patent error-ah min ngaih sak ula, kan officer ten engkim an lo chhinchhiah a, khalai neuh neuh te kha a dik zawk, a dik lo zawk, la tih ve tlat te pawh a awm thei a ni. Kan member te sawisel te pawh kha, chuvangin helaiiah hian a dik zawk a ni han tih ve pawh kha a fel thei lova. Chuvangin patent error ah min ngaih sak ula, khang te chu kan lo en ang a. Ama'rawhchu, a main Act hrim hrim hi chu a nih ang anga vawiin ah hian a tum nichina kan sawi ang khan kan duh ber, kan tum, kan mamawhna lai kha kan rilruah lian phawt mai sela. A famkim lohna lai a awm leh nakinah amendment te pawh a la tih theih zel a, chutiang chuan min kalpui theih chuan a lawmawm khawp ang. He kan Bill pawimawh tak mai "The Mizoram Drugs Controlled (Substances Bill), 2016" hi he House-ah hian min pass pui ngei ka duh a. Vawiinah hian ka ngaihndan takah phei chuan hemi kawngah hian chak zawk, nasa zawka hma kan lak na tluka ram hmangaihna tur hnama chianna tur hi a awm in ka hre lo a ni. Ka sawi tawh ang khan ramri kan in hmangaih siak te, sawi tur in ngah siak te, kan tum dan in sawi siak te hi dah tha ila. Vawiina kan hnam ei chhe mek-tu, nunna tam tak suattu damdawi ruihhlo kan hman sual te hi do ila, chu chu kan ram leh hnam hmangaihna a nih ka ring a.

Tin, NGO tam tak te, zirlai hruaitu te ngei pawh ka rooma an lokal in ka sawi ber chu hei hi a ni. "Vawiin ni ah hian zirlai pawl angin hawh u, drug hi i do vang u. Zirlai zingah chuan zirlai hruaitu ten in sawi hi an ring ber, KTP te, TKP ah chuan an hruaitu te sawi an pawm ber. Chuvangin nangni te hian kum puan-ah te nei ve teh u, Drugs Abuse Prevention Awareness te nei rawh u, chutiang chuan tang tlang ang u, College tinah nangni zirlai hruaitu ten hetiang kawng in zawh chuan he hnam hi kan chhan thei a ni. Vawiina a ti lai mek te kan ti sim thei lo a nih pawhin heng ho ti mek, an tih hnu ah ti dang an awm tawh lohna turin kha awareness kha a tangkai dawn a ni,' tiin ka lo hrilh ve thin a ni. Chuti khawpa kan vei tlang a nih chuan a ti zel tur veng a ti thar awm tawh lovin he hnam hi hemi kawngah hian kan free tawh dawn a ni. Vawiinah Baptist thalai pawl te chuan ram pumah human trafficking te drugs abuse awareness ah te kum puan ah neiin an bei mek a ni. Keini sorkar department ang pawh hian kan thawk ho va, an ti tha em em a ni. Kan kohhran dang thalaite pawh hi lokal rawh se, NGO te, kan thalai hruaitu zawng zawng te pawh hi hemi prevention awareness kawngah hian kal thei ila chu kum 10 hnu ah chuan hemi lakah hian kan la free ang tih hi ka vision ve pakhat a ni.

Awle, Pu Deputy Speaker vawiin-ah hian kan hnam in a mamawh tak mai Dan "The Mizoram Drugs Controlled (Substances Bill), 2016" hi he House hian min pass pui turin ka ngen e. Ka lawm e.

DEPUTY SPEAKER : Awle, Minister in fiah takin a wind up a, memberte hriat fiah loh lai te a hrilh fiah a ni. Spelling mistake chiang kha chu a rawn dil ang khan patent error-ah pawm sak mai ila kan remti em, a tha ang e. Section 5 ami te kha "sale proceed" tih kha drugs kan zuar ve mai dawn em ni tih ang

te, member thenkhat han sawi a man-tuten an man a, an thil man drugs te han hal ral mai kha chu uihawm tak te a lo awm thei a. Khang ang kha court in a confiscate ang a, hralh a, kha sum kha hemi atana hman leh theihna tur zawk a ni.

Tin, section 16-ah khan “Notwithstanding anything containing in the Court of criminal procedure” tih tak hi in hriatthiam loh lai kha a ni in ka hria a, a rawn sawifiah tawh tho va. He Dana convict ho hrem reng reng kha CRPC 1973 hian Dan bawhchhia hrem te ngaihdam theihna te a nei duah a; tin, Dan dang te pawhin. Khang ang ah khan eng ang pawh lo awm se he Dan hnuai hrem hi chu ngaihdam emaw, tihdanglam emaw khang kha a theih loh vang tihna a ni zawk a ni.

Tin, officer peonto peon tih te kha sawi a awm a, hengte pawh hi department hrang hrang hming phuah dan te pawh a danglam thei a, khang ah khan responsible chin peon te, constable te chung a ni tur a ni tihna zawk kha a ni a, khangte power zu pekna tur kha a ni lo a ni. Hei entirnan - kan PSO-ah te pawh constable te min pek chuan Personal Security Officer an ni daih a nia, Officer kha an ni daih a, chuvangin hengte pawh hi a tul a ni ang e.

Tin, section 22-na “Between sun rise and sun set” tih kha, ava dap theih hun chhung leh mi a man theih hun chhung tur kha, zing ni chhuah atanga tlai ni tlak chhung kha chuan warrant tel lo pawhin a man thei a ni. Mahse ni tlak hnu zan-ah kha chuan warrant tel loh chuan dap lo tur a ni a. Ama’rawhchu, a chhan tha tawh a awm chuan warrant lak leh te te a an chet chuan thil an lo ti pawh hman ang tih a hlauhawm a nih chuan power a pe ta a, mahse a tih chhan a kha record tur a ni. Khami kha kan han chhiar chhuah khan Chiang lo deuhawm in a hriat theih a, chu chu a ni a.

Tin, ‘etc.’ hi Dana awm chu tih te kha a ni a. Helai hian sample draw chungchang-ah kan Prosecution te Court-a an tlak fo na a ni a. Sample draw chungchangah sorkar in a bithliah tur engzahnge a draw ang, engtinge tih zawng zawng kha helai hian a ti dawn a ni, sawi vek sen a ni lova, chuvangin etc. tih a dah ta a ni. Dan dangah pawh etc. tih an dah chuan entirnan - pen, pencil etc. an lo tih chuan, ‘etc.’ chuan paper emaw a huam thei a, a related word kha ‘etc’ hian a huam thei a ni tih a ni a, court lam te pawhin interprete dan an nei a ni tih kha member ten kan hriat a tha awm e. Chung bak chu kan Minister khan fiah takin a rawn sawi tawh a. Tunah, “The Mizoram Drug Controlled (Substances Bill), 2016” hi pass remti apiangin remti ti rawh ule. (MEMBERS: Remti) Pass remti lo kan awm chuan ‘remti lo’ ti rawh ule, aw remti lo kan awm lova a lawmawm e. “The Mizoram Drug (Controlled Substances) Bill, 2016” chu House-in lungrual takin a passed ta a ni. (Minister : Pu Deputy Speaker, ka lawm e)

Kan passed tawh bawh a, nichina Minister zahawm takin a sawi ang khan, he Bill hi Dan a lo ni dawn ta a kan House Leader zahawm tak thahnemngaihna a ni a, tunhmain heng Dan hi kan mamawh a ni tih sawi a nasa a. Central Act a awm tho va, hemi hi State Amendment siam theih chin State

dangte pawhin an lo siam a. Khang kha Mizoram mila amendment siam hi tum thin a lo ni tawh a, mahse Centralin a pawmpui leh a ngai a ni. Mahse Centralin an pawmpui hlei thei lo a ni. Kan sawi ang khan kan buaina hi khu lamah a ni ve si lova, kan mila Dan hrang kan neih mai hi a tul a. Chuvang chuan kan House Leader te, kan Minister thahnemngaihna in kan lo nei ta a ni. Term hmasa atangin Dan tha tak tak an siam chho va, in fakawm ka ti a. Mizo Customary Law rei tak lo buaipui tawh te tunah chuan Dan tha tak kan nei tawh a, a lawmawm ka ti a. Vawiin-ah drugs lamah Dan tha tak kan nei leh a, a lawmawm hle a ni. Member zawng zawnge ngaihtuahna senga thahnemngai taka in sawi hona ah lawmthu ka sawi bawk a ni.

Tikhan vawiina kan tih tur chu kan zo ta a, kan chawl tawh ang a, naktuk ni 8.12.2016 chawhma dar 10:30-ah kan thukhawm leh dawn nia.

Sitting adjourned at 3:17 PM.